

Жалолиддин РУМИЙ

“МАСНАВИЙ”ДАН ИБРАТЛИ ҲИКМАТЛАР

Туркчадан Абдуллоҳ Раҳимбоев таржимаси

БИРИНЧИ КИТОБ

КАЛ ТҮТИ

Баққол дўқонида патлари яшил, овози ёқимли тўти боқарди. Тўти нашъали гаплари билан харидорларни кулдирава дўқонда қоровуллик қиласи эди.

Бир куни баққол тўтини дўконда қолдириб, шошилганча уйига кетди. Бироздан сўнг бир мушук сичқон қувлаганча дўконга югуриб кирди. Мушукни кўрган қуш жон аччиғида учиб тепароққа, гулёғи шиша идишлар устига қўнди. Кўрқувнинг зўридан шишадан шишага учиб бир нечтасини синдириб юборди. Баққол ишини битириб, дўқонига қайтди. Қараса, ҳаммаёқ ағдар-тўнтар, қимматбаҳо ёғлар тўкилиб-сочилган. Буни тўти қилганини дарҳол англади. Газаби қўзиб қушининг бошига зарб билан урди. Тўтининг бошидаги патлари тўкилиб тушди ва кал бўлиб қолди. Баққол ўз қилмишидан қаттиқ пушаймон бўлиб: «Бу қушни ургандан кўра кўлларим сингани яхши эди!», деб ачинишга тушди. Устига-устак, тўти гапиришни ҳам буткул йиғиштириди. Суюкли қушининг яна гапириши учун уни ширинликлар билан сийлади, назрлар қила бошлиди, йўқсилларга садақа улашди. Орадан уч кечаю уч кундуз ўтди. Баққол дўқонида хафа ҳолда, «Тўтимни яна қайтадан қандай

гапиртирсам?», дея ўйлаб ўтиради. Қушига турли ажойиб-ғаройиб томошалар кўрсатарди. Шу пайт дўкон олдидан кал бир дарвеш ўтиб қолди. Тўти уни кўрган заҳоти: «Эй дўстим! Сен нега кал бўлдинг, йўқса сен ҳам менга ўхшаб гулёғи шишаларни тушириб юбордингми?», дея қичкира кетди...

Қиссадан ҳисса шуки, тоза ва покиза кишиларнинг ишини ўзингникига қиёслама. Араб имлосидаги «шер» ва «шир» сўзлари бир хил шаклда ёзилади. Лекин биридан асал томса, иккинчисидан заҳар томади. Икки қамиши ҳам бир кўлда ўсади. Бирининг ичи бўши, иккинчисиники тўла шакар. Ушибу тақлидчи тўти билан Ҳақ таолонинг розилигини истаб қаландарлик йўлини танлаган дарвеш орасида ҳам беҳад фарқ бор.

Пурмаъно ҳикоядан яна шундай хулоса қилиши мумкинки, инсон ишида шошилмаслиги даркор. Жаҳл билан, шошқалоқлик қилиб иши бошласалар, охирида пушаймон бўладилар.

ҚУЁННИНГ ТАДБИРИ

Турли ҳайвонлар яшайдиган гўзал ўрмон бор эди. Ўрмон кироли шердан барча ҳайвонлар қаттиқ қўркар, у ҳар куни истаган ҳайвонни овлаб ер, ўрмон жониворлари ундан нафратланар эди. Бир куни ҳайвонлар йиғилиб: «Ҳар сония зир титраб яшагандан кўра ҳар куни орамиздан биримизни ўзимиз танлаб, шерга тортиқ қилганимиз яхшироқ. Шу билан кимнинг куни битишини билиб оламиз», деб қарор қилди. Сўнг шерга бориб: «Биз сенга ҳар куни бирор ҳайвонни жўнатиб турамиз. Сен ҳар ерда ташланиб, бизни ҳаётдан бездирма!», дея таклиф қилдилар.

Аввалига шер бу таклифни тузоқ деб ўйлади. Аммо ҳайвонлар қасам ичиб, ваъда беришгач, у рози бўлди. Ўрмон аҳли ҳар куни қуръа ташлаб, ўзларидан бирини шерга жўнатор эди. Шер заҳматсиз, ўз оёғи билан келган емишини еб, ҳайвонларни овлашни тўхтатди. Кунлар мана шу тарзда ўтарди. Ўлим қуръаси бир куни қуёнга чиқиб қолди. Бечора зорланиб дод-вой сола бошлади. Ҳайвонларга: «Бу зулм яна қачонгача давом этади?!», дея хитоб қилди. Улар: «Неча йиллардан буён шерга берган сўзимизда турибмиз. У ҳам ваъдасига хилоф қилгани йўқ. Энди сен қоидани бузмагин-да, шернинг инига бор!», дейишиди.

Қуён: «Эй дўстлар! Хўп денг, мен бир чора кўрай, зора ўзимни ҳам, сизни ҳам унинг зулмидан қутқариб қололсам!», деди.

Ҳайвонлар: «Сен бизнинг сўзимиздан чиқма ва нимжонгина қуён эканингни ҳам унутма, ҳаддингдан ошма!», дейишиди.

Қуён: «Дўстларим, бу фикрни менга Аллоҳ илҳом қилди. Айтингчи, асаларидаги ари йиғиш илҳоми қайси шерда бор? Ипакқуртнинг маърифати қайси филда бор?», деди.

Ҳайвонлар: «Модомики, бўй-бастинга қарамасдан, шер билан ўйнашмоқчи экансан, бирор режанг борми ўзи?», дейишиди.

Қуён: «Сирнинг сақлангани, вақти-соати етмагунча ҳеч кимга айтилмагани дуруст. Кутинг ва томоша қилинг», деб шер томон йўл олди.

Бироз уёқ-буёқда айланиб юриб, овқатланиш вақтини ўтказиб юборди. Шер инига яқинлашгач, бор қучи билан югурга бошлади. Шер таомининг кечикканидан жуда жаҳли чиқаётган эди. Қуённи қўриб: «Эй ахлоқсиз, мен хўқизларни суякларга ажратган, неча-неча арслонларни ер тишлатган қаҳрамон бўлсан-у, сен шугина ҳолинг билан мени куттиришдек жасоратни қаердан олдинг?!», деб ўшқирди.

Қуён ҳаллослаганча: «Султоним! мен эрталаб йўлга чиқиб хузурингизга келаётган эдим. Яна мен билан сиз учун юборилган бошқа семизроқ қуён ҳам бор эди. Аммо йўлимизни бошқа бир шер тўсди. Унга сизнинг олдингизга келаётганимизни тушунтиридик, лекин у бизга қулоқ солмади ва дўстимни олиб кетди. У мендан икки баробар катта эди. Султоним, мен бундан буён сизга юбориладиган ҳайвонларга нариги шер ҳам шерик бўлади, деб қўрқаман. Агар таомингизни тўлиқ ейишни истасангиз, бунга бир чора кўринг, у баҳайбат душманингизни йўқ қилинг!», деди.

Шернинг ғазаби тўлиб-тошди: «Қани, олдимга туш! Уни менга кўрсат, бориб жазосини берай!», деди.

Қуён олдинда, шер эса орқада борарди. Қуён юра-юра шерни бир қудук ёнига олиб борди. Лекин ўзини қудуқдан узоқроққа тортди.

Шер: «Нима бўлди, нега орқага чекиняпсан?», деди.

Қуён: «Мен у ерга яқинлашишга қўрқаяпман», деди.

Шер: «Баҳонангни қўй, қара-чи, у ҳали ҳам шу ердами?», деди.

Қуён: «Сиз мени қучоғингизга олсангиз, шунда қарашим мүмкин», деди.

Шер қуённи қучоғига олиб қудукқа қаради. Қудукда ўзига ўхшаган баҳайбат шер турибди. Қўлида эса унинг учун юборилган қуён. Жаҳлидан ёниб турган шер уни ўзининг сувдаги акси эканини англамади. Қуённи бир четга улоқтириб, қудукқа отилди. Қуён эса сакраб-сакраб ўрмонга кетди. Бўлиб ўтган ҳодисани эшитиб, ўрмон аҳли хурсандликдан жўшиб ўйнашди. Қуён уларнинг бу шодон ҳолларини кўргач: «Эй дўйстлар, менинг бу омадим Аллоҳнинг инояти билан бўлди. Йўқса, бир қуён ким бўлибдики шерни енгса?», деди.

Эй одам боласи! Бошқалардан кўрган зулм-ситамларинг ўзингдаги хулқ-авторингнинг аксидир. Аллоҳнинг лутф қилган ақл-илҳоми ва ёрдами билан кичик жамоалар катта жамоалардан устун келган!

Эй инсон! Сен бу дунё қудугига ҳирсинг билан сакраган шерсан. Сен нафсингни енг-да, қуён каби бўл!

«ЖОНИМНИ АСРАЙ!»

Бир одам шошилганча ҳазрати Сулаймоннинг саройига келди. Юзи ғам-қайғудан сарғайиб, қўрқувдан лаблари қалтирар эди. Ҳазрати Сулаймон ундан: «Сенга нима бўлди?», деб сўради.

У: «Эй Султон, Азроилни кўрдим, менга шундай назар солдики...»

Ҳазрати Сулаймон: «Мендан нима истайсан?», деди.

У: «Шамолга амр қилинг. Мени Ҳиндистонга элтсин. Жонимни асрай!», деди.

Ҳазрати Сулаймон амр қилди. Шамол уни денгизлардан ошириб Ҳиндистон ерига олиб бориб қўйди. Эртаси куни бир мажлис бўлиб, унда Азроил ҳам бор эди. Сулаймон пайғамбар ундан: «У бечора одамни ватани, оиласи, мол ва мулкидан айриш учун шундай нигоҳ билан қарадингми?», деб сўради.

Азроил: «Мен унга ғазаб билан қарамадим, ажаблануб боқдим. Чунки, Аллоҳ менга унинг жонини бугун Ҳиндистонда олишимни амр қилган эди. Унинг қирқ қаноти бўлса ҳам, бу ердан Ҳиндистонга етиб олиши мумкин эмасди. Мен шу сабабдан ажабланган эдим. Шу кеча мен унинг жонини Ҳиндистоннинг фалон жойида олиб қайтдим», деб жавоб берди.

Энди ўйлаб кўрайлик. Биз кимдан қочаяпмиз? Ўзимизданми, бу хаёлий бир нарса холос-ку?! Кимдан яшириняпмиз? Аллоҳданми, бу ҳам хомхаёлдан бошқа эмас-ку?!

Дунё – Аллоҳдан ғофил бўлмоқдир. Билгинки, дунё фақатгина бола-чақа, аҳли-аёл, кийим-кечак ва молиявий тижоратдан иборат эмас, шуни асло унутма!

Бу дунё зиндондир, биз эса маҳбуслармиз. Зиндондан қочиб ўзингни қутқар. Асло унумагинки, илоҳий қазо ва қадардан қочиб қутилиши имконсиздир.

СУЛТОН ВА ЖОРИЯ

Қадим замонда бир султон бор эди. Унинг мол-дунёси кўп, қалби ҳам тўқ одам эди. Шоҳ дўстлари билан овга чиқди. Йўлда бир жорияни кўриб қолди. Киз беҳад гўзал эдики, султоннинг ўша захотиёқ унга ишқи тушди. Тутқин қуш қафасда қандай чирпиниб-талпинса, султоннинг юраги ҳам кўкрак қафасида шундай урар эди. Жорияни хўжайинидан сотиб олди. Бундан султон жуда ҳам баҳтиёр эди. Ой юзли севгилисига етишган эди. Лекин унинг баҳти узокқа бормади. Жория қаттиқ хаста бўлиб қолди. Ўлканинг тўрт томонидан табиблар чакирилди. Султон уларга ёлвориб: «Иккимизнинг ҳам ҳаётимиз сизнинг қўлингизда, менинг ҳаётим уникидир. Ким уни даволай олса бор-будумни бераман!», деди.

Табиблар: «Биз бор билим ва тажрибамизни сарфлаб, уни даволаймиз», дейишди. Ҳеч бири: «Биз қўлимиздан келганини қиласиз, албатта, шифо Аллоҳдандир, хаста тузалса, Унинг изни билан тузалади», демади. Орадан кунлар ўтди, табиблар жорияга қайси дорини бермасин фойда бўлмади. Жория кундан кун озиб-тўзиб борарди. Султон эса йиғлар, қўзларидан ирмоқдан оқсан сувдек ёш оқарди. У ҳакимларнинг ҳаракатлари билан жорияси тузалмаслигини билгач, масжидга ошиқди. Мехроб олдига тиз чўқди ва сажда қилиб қалбидаги бутун самимиятлари билан, ихлос ила Роббига ёлвориб: «Аллоҳим, Сенинг менга берган жаҳон ҳукумдорлиги менга берган энг кичик неъматингдир. Мен нима ҳам дейман, қалбим тўридаги истакларимни мендан кўра Ўзинг яхшироқ билгувчисан!», деди.

Султон ёлвориб дуо қилди. Ногаҳон уни уйқу олди. Туш кўрди, тушига бир нурли қария кирди ва: «Эй Султон, сенга хушхабарим бор. Тилакларинг қабул бўлди. Эртага эшигингга бир ғарив кимса келади. Уни асло ҳайдаб юборма. Ҳакимда бўлиши керак сифатлар унда тўқисдир. У ишониладиган ва

асраб-авайланадиган инсондир», деди.

Султон уйғониб, эртани кутишга тушди. Тонг отиб, юлдузлар кетма-кет сўна бошлаганида, тушида ишора қилинган ҳакимни дераза олдида кутиб турарди. Узоқдан бир мўйсафит саройга келаётганини кўргач, у томон ошиқди. Барчадан олдин бориб, уни кутиб олди. Қучоқлаб, қўлларидан ўпди. Саройга киришди, узоқ сухбатлашдилар, дастурхонга таом тортилди. Сўнгра биргалиқда хастанинг бошига келишди. Табиб хастанинг юрак уришини, тана ҳароратини текширди. Олдинги табиблар қилган муолажалар бечоранинг дардини янада зиёда қилган, шифо бериш ўрнига, куч-куватидан айирган эди. Ҳаким унинг дарди нима эканини дарҳол фаҳмлади. Жориянинг вужуди соғсаломат, фақатгина қалби яраланган эди. Унинг касаллиги қалб касали. Табиб султонга қараб: «Барча бу ерни тарқ этсин, ҳатто сиз ҳам, атрофда кимса қолмасин. Мен беморга баъзи саволларни бераман, лекин гапларимизни ҳеч ким эшитмаслиги керак», деди.

Ҳарам бўшатилди. Табиб жориянинг томирини ушлаб, унга саволлар бера бошлади: «Сен қаерликсан? Ҳар мамлакатнинг давоси бошқа-бошқа бўлади. Менга айтчи, ҳожанг, дўстинг, қариндошларинг кимлар?», деди.

Жория аввалги уйини, эски хўжайнларини, туғилиб ўсган жойини айта бошлади. Табиб диққат билан тинглаб, томир уришини кузатиб турарди. Агар бирор исмни айтганда томир уриши тезлашса, билардики, бемор қалбининг давоси ўша. Жория аввал яшаган уйлар ва шаҳарларни, эски хўжайнларини бирма-бир санади. Лекин на юзининг рангида ва на томир уришида ўзгариш бўлди. Токи у навқирон Самарқандни тилга олиши билан томир уриши тезлашди, ранги ҳам ўзгарди. Маълум бўлдики, жория Самарқандлик бир заргарга ошиқ экан. Қалби ўша заргар хасратидан дардга чалинган эди. Табиб хасталик сабабини билиб олди. Ундан заргарнинг манзилини

сўради. Сўнгра султон ҳузурига бориб, бор гапни айтди: «Хозирча бунинг давоси ўша заргарни топиб, бу ерга олиб келишдир. Ҳадялар тайёрлаб икки ишончли одамни юборинг, уни саройинга таклиф қилинг», деди.

Султоннинг хизматчилари юра-юра заргарнинг уйига бориб, унга: «Хушхабар! Султон сенга қимматбаҳо совғалар юбориб, сени ўз саройига таклиф этди!», дейишди.

Заргар ҳадя қилинган олтину жавоҳирларга маҳлиё бўлиб, йўлга отланди. Саройга етгач, табиб йигитни султон ҳузурига бошлади. Султон илтифотлар кўрсатиб, сарой хазинасининг калитларини топширди ва унга жонидан ортиқ севган суюкли жориясини ҳам берди. Олти ой ўтиб, жориянинг хасталиги астасекин тузала борди. Охир-оқибат дардидан асар ҳам қолмади ва батамом соғайиб кетди.

Табиб заҳарли шарбат тайёрлаб уни заргарга ичирди. Заргар кундан-кун бадбашара бўла бошлади. Жориянинг кўз ўнгида йигитнинг чироий йўқолиб, қизнинг муҳаббати ҳам сўниб борди. Бечора заргарнинг кўз ёшлари дарё-дарё бўлиб оқди. У: «Бу дунё бир тоққа, феълимиз ва амалларимиз эса нидога ўхшайди. Овозимиз хоҳ чиройли бўлсин, хоҳ ёқимсиз, тоғда акс-садоси янграб яна ўзимизга қайтади», деди-да, жон таслим қилди. Жория хасталиқдан тамоман қутилди.

Ҳикоядаги султон – инсоннинг борлиги бўлган муқаддас руҳидир. Гўзал жсория – нафс тимсоли. Нафс – вужуднинг яхши-ёмон, фойда-зарарига қарамасдан орзу қиласиган истак-хоҳишиларининг манбаи.

Табиб эса – инсонларга тўғри йўл кўрсатадиган Аллоҳнинг хос қулларидан.

Заргар – ўткинчи дунё ҳаёти. Нафс уни орзу қиласи ва шу орзу ортидан хасталанади. Нафсга қул руҳ эса ундан келадиган бало-офатларга дучор бўлади. Нафс орзулари гўззаликни кетказадиган фоний матоҳлардир.

Ҳазрати Мавлоно ҳикоянинг бошига шундай изоҳ битган эканлар: «Аслида, бу ҳикоя бизнинг ҳолимиз баёнидир!».

САЙРАШНИ БАС ҚИЛ!

Савдогар қафасда тўти боқар эди. Бир куни у Ҳиндистон сафарига отланди. Саҳоватпеша тожир ўз хизматкорларига: «Истакларингизни айтинг, Ҳиндистондан сизга нима келтирай?», деб сўради.

Ҳар ким ўз хоҳишини арз қилди. Тижоратчи уларга сўрганларини олиб келишга вайда берди. Навбат тўтига етди: «У ердаги тўтиларни топиб, мендан салом айт ва қафасдаги ҳаётимдан воқиф эт. Бундай ғурбатли жойларда ҳам биродари борлигини уларга эслатгинки, ям-яшил ўрмонларда қанот қоқиб, шоҳдан-шоҳга озод учиб юрганида мени ҳам бир эслаб қўйишишсан!», деди.

Тожир қушининг ғаройиб истагини ҳам бажо этишга вайда бериб йўлга чиқди. Ҳиндистонга боргач, бир ерда тўтилар галасини учратиб қолди. Уларга қушининг саломи ва айтганларини етказди. Ҳикояни тинглаб турган бир тўти турган жойида титради ва ерга йиқилди. Бу ҳолни кўрган тожир: «Эссиз, нима қилиб қўйдим, кошки айтмаганимда, бир жонни ўлдириб қўймасдим!», деб ғамга ботди. Ишларини битириб уйига қайтгач, хизматкорларига хадя улашди. Тўти ҳали навбати етмай: «Менинг истагим нима бўлди, у ердаги тўтиларга арзимни етказдингми?!», дея ошиқди.

Тожир: «Эҳ, қани эди етказмаганимда! Дўстларингга сенинг гапларингни айтишим билан бири титраган кўйи шоҳдан йиқилиб тушди, нафаси етмай ўлди!», деди.

Ҳиндистондаги қушининг ҳолини эшигтан тўтини ҳам шу заҳоти титроқ босди. У ҳам турган жойидан йиқилди. Тожир гўзал тўтисининг ўлганидан баттар сиқилди. Бошидаги кийимини ечиб ерга урди: «Оҳ менинг хушвуз қушим, сенга нима бўлди, нега бу ахволга тушдинг?!», деб йиғлай бошлади.

Йиғлай-йиғлай қушини қафасдан чиқарди. Тўти эса шу

захоти қанот қоқиб, уй яқинидаги дараҳт шохига қўнди. Тожир унинг бу қилифини кўргач: «Эй қуш, Ҳиндистондаги тўти сенга нимани ўргатди?», деб сўради.

Тўти жавоб берди: «У менга: «Сайрашни бас қилиб, ўзингни ўлганга сол, шунда қафасдан ҳам, асирикдан ҳам кутиласан. Сайраб тураверсанг, сени қафасдан чиқаришмайди», деб ўргатди. Унинг айтганига риоя қилдим ва қафасдан кутулдим».

Тан қафасининг маҳбуси бўлган инсон руҳи ҳам нафс асоратидан халос бўлмагунча ҳурриятга эриша олмайди.

Шунингдек, ким гўзалликни, унга берилган фазлу камолни кўз-кўз қилса, юзлаб машаққатлар, уқубатлар остида қолади. Душманларнинг гинаю кудуратлари, ҳасад ва хусуматларига учраб, жабру зулм кўради.

СУЗИШНИ БИЛМАГАН ТИЛШУНОС

Тил қоидаларини пухта биладиган тилшунос бор эди. У ўзининг бу фазилати билан фахрланарди. Бир куни кемага чикиб, дengиз сафарига отланди. Кемачига юзланиб: «Сен тил қоидаларини ўргангандисан?», деб сўради. «Йўқ», деди кемачи. Тилшунос: «Ундай бўлса, сенинг ярим умринг бекор кетибди», деди. Кемачининг бу гапдан кўнгли оғриди, лекин дарров жавоб қайтармади.

Тўсатдан шамол кўтарилиб, сув кемани қаърига торта бошлади. Кема гирдобга яқинлаша борди. Кемачи йўловчига: «Эй тилшунос, сузишни биласанми?», деди.

Тилшунос: «Йўқ! Билмайман», деб жавоб берди.

«Ундай бўлса, сенинг бутун умринг зое кетибди. Чунки бироздан сўнг кема гарқ бўлади. Билгинки, ҳозир нахвни, яъни тил қоидаларини билиш эмас, маҳв илми – фано бўлиш кўл келади. Агар фано бўлиш илмини билсанг, ўзингни хотиржам дengизга от!», деди кемачи.

Сен ҳам агар инсонийлик сифатларингдан, ёмон хулқатворингдан ўлиб қутиссангина, Ҳақнинг сирлар денгизи сени ўз устига чиқариб олади.

Кишининг гап-сўз ва амали унинг дараҷасидир. Ҳар ким дунёга ўз фикр доирасидан туриб назар солади. Қалб кўзи кўр инсон нарса-ҳодисаларнинг фақат суратини кўради, холос, моҳиятини англай олмайди.

МАҚСАДГА МАШАҚҚАТСИЗ ЕТИШ МУМКИНМИ?

Бир киши ўзига вашм (татуировка) чиздирмоқчи бўлди. Бу ишнинг устасига бориб: «Менинг баданимга сурат чизиб кўйсангиз, илтимос!», деди.

Вашмчи: «Марҳамат, қандай расм чизай?», деб сўради.

Киши: «Важоҳатли шер расмини чизинг, лекин аниқ ўхшасин!», деди.

Вашмчи: «Шернинг расмини қаерингизга чизай?», деб сўради.

У: «Елкамга», деди.

Вашмчи нинасини унинг елкасига ботирди. Шу заҳотиёқ киши додлаб юборди: «Эй жаноб, жонимни оғритдингиз-ку, қандай расм чизяпсиз ўзи?!».

Вашмчи: «Айтганингиздек шер тасвирини чизяпман», деди.

Киши: «Хўп, шернинг қаерини чизяпсиз?».

Вашмчи: «Думини», деди.

Киши: «Майли, думсиз бўла қолсин, мени ортиқ кийнаманг», деди.

Вашмчи унинг баданига яна нинасини ботирди, мижоз дод-фарёд солди: «Энди-чи, энди қаерини чизяпсиз?».

«Кулоғини!», деди уста.

«Кулоқсиз бўла қолсин. Жонимни оғритмай, ишингизни тезроқ битиринг», деди у.

Вашмчи қайтадан ишига киришган ҳам эдики, киши яна фарёд қилди: «Энди қаерини чизяпсиз?».

Вашмчи: «Қорнини».

Киши: «Жоним азобланаяпти, қорнини ҳам чизмай кўя қолинг», деди.

Вашмчи мижозидан ажабланиб, нинани улоқтирди ва: «Бундай ҳолга илк бор тушишим. Думсиз, қулоқсиз ва гавдасиз шерни ким кўрибди?!», деди.

Эй биродар! Мақсадинг йўлидаги қийинчилкларга сабр қил. Шунда ўзингнинг беодоб нафсинг хоҳишиларидан қутиласан. Нафсини поклаган, кўнглида илоҳий ишқ туйғусини уйготган, атрофини ойдинлатишни ўрганган киши Аллоҳнинг нури ила оламга боқади!

ХУШЁР ТУЛКИ

Шер, тулки ва бўри ўзаро келишиб, овга чиқишид. Улар бир-бирларига ёрдамлашиб, ўлжаларни осонгина қўлга киритишни режалаштиришган эди. Ўрмон қироли шер бу ҳамроҳлари билан ов қилишга ор қилса-да, шерикликка рози бўлди. Бўри ва тулки, баҳайбат шер ортидан эргашдилар. Улар ёввойи ҳўкиз, эчки ва қуён овлашди. Ўлжаларини ўрмонга олиб кирдилар. Бўри билан тулки жуда очиқкан, ўлжаларга қараб, оғизларининг суви оқарди. Буни сезган шер ичидан «Кўрамиз, сизга нима тегаркан?», деб қўйди.

Бўрига қараб: «Эй қари, тажрибали бўри. Ўлжаларни ўзинг тақсимлагин-чи, адолатингни бир кўрайлик», деди.

Бўри ўзича тақсимлашга киришиб, шерга: «Мана бу ёввойи бузоқ сенинг улушинг, эчки менга, қуён эса тулкига тегади», деди.

Шер ғазаб билан: «Эй бўри, менинг ҳузуримда ўзингча «бу сенга, бу менга» деб тақсим қиласанми. Менинг ёнимга кел-чи, сенга ким эканимни билдириб қўяй?!», деди.

Бўри у тарафга яқинлашар экан, шер панжаси билан бир уриб унинг бошини ёрди.

Кейин тулкига қараб: «Қани, энди сен кел. Ўзинг адолат билан тақсимла!», деди.

Тулки: «Эй тенги йўқ шер! Мана бу семиз ҳўкиз сизнинг нонуштангиз, эчки тушлигингиз, қуён эса кечга яраб қолар», деди.

Шер бу тақсимотдан мамнун бўлиб: «Эй тулки, сен бундай оқилона тақсимлашни қаердан ўргандинг?», деб сўради.

Тулки: «Бўрининг бошига тушган нарсадан ўргандим!», деб жавоб берди.

Ақлли инсон бошқаларнинг хатоларидан, улар йўлиққан балолардан ибрат олади. Фиръавн, Од қавмларининг бошига

тушганларни билғанларидан кейин, дунёга бўлган ҳирси, кибр ва ғурурини четга суреб ташлайди. Агар дунё матосидан, ўзини катта тутишидан ва ҳирсидан воз кечмайдиган бўлса, бундан кейин унинг ҳолидан, ақлсизлигидан боишқалар ибрат олади.

КИМ У?

Ошиқ ёрининг остонасига келиб, эшикни тақиллатди. Севгилиси ичкаридан: «Ким у эшикни тақиллатаётган?», деб сўради.

Ошиқ: «Менман, мен!», дея жавоб берди.

Маҳбуба: «Сен бўлсанг, кет бу ердан! Сен ҳали камолга етганинг йўқ», деди.

Бечора ошиқ ноилож ортига бурилиб кетди. Кун сайин уни ишқ азоби ва севгилисининг хасратидан қийналиб борарди. Орадан роппа-роса бир йил ўтгач, яна маҳбубасининг эшигини тақиллатди. Ичкаридан: «Ким у?», деган жавоб келди.

Ошиқ: «Эй маҳбуба, бу сенсан, сен!», деди.

Маҳбубаси: «Ичкарига марҳабо! Бу уй тордир. Унга фақатгина бир жон сифади. Ип икки тур бўлса, нина тешигидан ўтмайди. Модомики, сен бирсан, келавер!», деди.

Фоний борлик ўзини боқийликка тўла-тўқис топширгандагина, у ҳам боқий ва барҳаётдир.

ҚАНДАЙ ҲАДЯ КЕЛТИРДИНГ?

Ҳазрати Юсуфнинг эшигини бир дўсти тақиллатди. Уни ичкарига таклиф қилдилар, узун сухбат қуришди. Дўсти Юсуфдан қудукқа ташланган вақтларида нималар содир бўлганини сўради. Ҳазрати Юсуф бошдан ўтказган ҳодисаларни айтиб бердилар. Сўнг: «Эй мусофири дўстим, менга нима ҳадя олиб келдинг?!», дедилар.

Дўсти: «Сизга совға қидирдим. Лекин бирор нарсани сизга муносиб деб билмадим. Бир томчи сувни улкан уммонга ҳадя қилиб олиб бориш мумкинми. Ўйлай-ўйлай, мана бу кўзгуни келтиришни маъқул кўрдим. Эй кўзимнинг нури! Зора, кўзгуга караб гўзал юзингизни кўрганингизда, мени бир бора эслаб кўярсиз?!», деди.

Дўстлар зиёратига қўли бўши ҳолда бориши тегирмонни буғдойсиз боришига ўхшайди. Маҳшарда Жаноби Ҳақ: «Киёмат куни учун қандай армуғон олиб келдингиз?», деб сўрайди.

Яратганинг ҳузурига қўли бўши ҳолда қандай бормоқчисиз? Ҳаёт неъмати вужудимиз ойнасини омонат сақлаб, чанг-губорлардан тозалаб, Соҳибига покиза қайтарии учун берилмаганми?!

КАРНИНГ БЕМОР ЗИЁРАТИГА БОРГАНИ

Кулоғи эшитмайдиган одамга бир киши: «Кўшнинг касал бўлиб қолибди», деб айтди. Шунда у ўзича, ўзига-ўзи: «Касал одамнинг овози паст чиқади, нима гапирганини қандай тушунаман, ҳолидан қандай хабар оламан», деб ўйлади. Ниҳоят, «Нима деганини лабларининг қимирилашидан билиб оламан. Олдинига: «Яхшимисиз, қўшни?», деб сўрайман. «Яхшиман, яхши», деб жавоб беради. Мен: «Аллоҳга шукрлар бўлсин! Нималар тановул қиляпсиз?», деб сўрайман. «Шарбат ёки шўрва ичдим», дейди. «Ош бўлсин, шифо бўлсин, тезда тузалиб кетинг!», дейман. «Табиблардан ким келаяпти, сизга ким қараб турибди?» деб сўрайман. «Фалончи» дейди. «Яхшики, уни чақирибсиз, у борган жойда ишлар яхши бўлади. У қараган хаста тезда тузалиб кетади», деб айтаман», деди.

Кар шундай ўйлар билан қўшнисини кўргани борди. Бемордан: «Қандайсиз, яхшимисиз?», деб сўради.

Кўшниси: «Аҳволим жуда оғир, ўлаётгандекман», деб жавоб қилди.

Кар: «Аллоҳга шукрлар бўлсин!», деди.

Кутилмаган жавобдан bemornining avzoi buziliib: «Бу қандай гап, ҳали қўшним менинг ўлимимни хоҳлаяптими?», деган хаёлга борди.

Аҳвол тубдан ўзгарганини пайқамаган кар: «Нималар тановул қиляпсиз?», деб сўради.

Касал: «Заҳар-закқум!», деди.

Кар: «Ёқимли иштаха!» деди. Бундан bemornining butkul jaҳzli чиқиб кетди.

Кар: «Табиблардан ким келаяпти, сизга ким қарайапти?», деб сўради.

Кўшниси: «Азроил келаяпти, аммо сен бу ердан даф бўл!», деб бўғилди.

Кар: «Уни чақириб түғри қилибсиз. У борган жойда ишлар яхши бўлади», деб уйдан чиқди. Кетаётиб: «Жуда яхши иш бўлди, қўшнимни зиёрат қилиб, кўнглини олдим!», деб ўйлади.

Қўшниси эса: «Бу киши менинг душманим экан. Менда касди бор экан», деб ётарди.

Қанчадан-қанча кишилар борки, бурчларини, ибодатларини юзаки бажарадилар. Улардан талаб қилинган бошқа, улар тақдим этган нарса бошқа-бошқа бўлиб чиқади. Ҳаёл билан ҳаёт бир-бирига мувофиқ келавермайди. Мазмун-моҳиятини англамай, юзаки қилган амал билан савоб тамаъ қилиб, жаннатни орзу этадилар. Ҳақдан бошқага қаратилган амал ибодат эмас, яширин гуноҳдир!

Риё учун ўқилган намоз, ташқаридан қанчалик соғ кўринса-да, ичида ширк бор. Ҳикоядаги кар киши ҳам «Яхшилик қилдим. Бир касал кўрдим, қўшиничилик ҳаққини адo этдим», деб ўзидан мамнун. Ҳолбуки, у кўнгил қозонаман деб кўнгилни яралаб қўйди. Таҳминий уйдирма гаплар билан беморни баттар азоблади.

РАССОМЛАР МУСОБАҚАСИ

Хитойлик рассомлар билан турк рассомлар баҳслашиб қолди. Хитойликлар: «Энг моҳир рассомлармиз» дейишиша, турк рассомлари ҳам бу борада ўзларидан ўтадигани йўқлигини даъво қиласади. Ким моҳирроқ эканини аниқлаш учун эса шахсан сulton мусобақа ташкиллаштириди. Аввалига турклар беллашувдан бош тортишиди. Хитойликлар: «Бизга бир хона, рақибларимизга ҳам алоҳида хон беринг, суратни ўша ерда чизамиз», дейишиди. Орасига парда тортилган икки хонада рассомлар ишга киришди.

Хитойликлар ҳазинадан ҳар куни турли рангдаги бўёқларни олишарди. Турклар эса на бўёқ сўрар ва на бошқа нарса. «Бизга фақатгина оддий қалам берсангиз кифоя», дейишиди. Хитойликлар расм чизаётганда, турклар деворни жилолаш билан банд эди. Девор топ-тоза кўринишга келди. Ниҳоят, хитойликлар ҳам расмни тугаллаб, ҳевинч ва хурсандчилик билан чолғулар чалиб, сultonга хабар юбордилар.

Сulton хитойлик рассомлар ижодини кўриб ҳайратда қолди. Навбат турк рассомларига келди. Турклар икки хона орасидаги пардани кўтардилар, хитойликлар чизган ажойиб расм деворда акс этди. Ҳатто, деворга жо бўлган сурат ҳақиқийсидан қўра жозибалироқ кўринарди. Томошабинлар туркларнинг ижодига тан берди.

Яхшиликлар билан жилоланган, ҳирс, тамаъ, хасислик каби кирлардан мусаффо, ойна каби соф кўнгилга гўзал суратлар жо бўлади.

ИККИНЧИ КИТОБ

МЕВАЛАРНИ КИМ ЕДИ?

Бир бадавлат кишининг қуллари орасида Луқмон исмли нимжон ва хунук қули бор эди. Ҳожаси заифхол Лукмонни кўп хўрларди. Бир куни хожа қулларига меваларни йиғиб-теришни буюрди. Улар мева йиғиши учун боқса кетишиди. Луқмондан бошқа қуллар очликка чидолмай, меваларни пақкос туширишиди. Қайтишгач, хожаларига меваларни Луқмон еганини айтишиди. Ҳожа унга қаттиқ сўзлар айтиб, жазоламоқчи бўлди. Луқмон ўзига ноҳақ айб қўйилганини айтиб: «Бизга тўйгунимизча иссиқ сув ичиринг ва отингизга миниб бизни юргутириб, бизни имтиҳон қилинг. Меваларни ким егани шунда маълум бўлади», деди.

Ҳожа бу таклифни қабул қилиб, қулларига тўйгунча иссиқ сув ичирди. Югурга-югурга ҳолдан тойган қуллар меъдалари куриб, еган-ичганларини қайт қила бошлишди ва ниҳоят меваларни ким егани ошкор бўлди.

*Қиёмат куни савобу-гуноҳлар, барча сирлар фош бўлади.
Иймон келтириб, эзгу амал қилганлар билан гуноҳкор-
жиноятчиларнинг ораси ажралади.*

ҚАБУЛ БҮЛМАГАН ДУО

Бир ўғри илончининг илонини ўғирлади. У ўлжасини ўзига танимат деб ўйлади. Илон жуда заҳарли эди. Ўғрини чақиб, кийнаб-азоблаб ўлдирди. Илончи ўғрининг ўлганини эшиштгач, уни ўзининг илони чаққанини англади. Ўзига ўзи: «Мен қанча изтироб чеккандим. “Ўғрини топсаму, илонимни қайтиб олсам”, деб дуолар қилдим. Аллоҳга шукрки, дуоларим қабул бўлмади. Зарар деб билганим, аслида, мен учун фойдали экан», деди.

Қанчадан-қанча дуолар борки, дуо қилувчи истагини хайрлик деб ўйлайди. Лекин у зарарли бўлади. Яна шундай дуолар борки улар хайрли бўлади, лекин сўралмайди ўрнига бошقا фитна бўлган нарсаларни сўрайди. Буюк фазл ва марҳамат соҳиби, чексиз ҳикмат эгаси Аллоҳ таоло бандаларига меҳрибонлигидан бу каби дуоларни қабул қилмайди.

ҲАР КИМ ЎЗ ИШИНИ ҚИЛСИН

Ҳазрати Исога бир нодон киши ҳамроҳ бўлди. Йўлда кетишар экан, бир қудук атрофида ётган суякларни кўриб қолди. Ҳазрати Исога: «Эй йўлдош дўстим, ўликларни тирилтирадиган муборак сўзларингизни менга ҳам ўргатсангиз. Менинг ҳам инсонларга фойдам тегса, ўликларга жон баҳш этсам!», деб сўради.

Ҳазрати Исо: «Жим бўл! У сен қиладиган иш эмас!», деб жавоб бердилар.

Лекин бу жоҳил кимса у зотни ҳол-жонларига қўймай: «Агар менга ўргатмасангиз, у муборак сўзларни ўзингиз ўқингда, мана бу суякларни тирилтилинг», деди.

Ҳазрати Исо нодоннинг ишидан хафа бўлиб: «Эй Роббим, нега бу одам ўзининг ўлган кўнгли қолиб, бошқаларнинг дардига дармон бўлишга уринаяпти?!», дедилар.

Ноилож, ҳазрати Исо Аллоҳга дуо қилдилар. Аллоҳ суякларга жон берди. Суяклар орасидан баҳайбат шер чиқди ва бир панжа уриб нодонни ўлдириб қўйди.

Эй Парвардигор! Бўлмагур, фойдасиз нарсалардан бизни узоқлаштирир. Бизга асал бўлиб кўрингани заҳар, најсотдек туюлгани тузоқ бўлиб чиқар экан. Бизга ҳар нарсани асл ҳолича кўрсат!

ЖОҲИЛНИНГ МУҲАББАТИ

Султоннинг бир лочини бор эди. Бир куни саройдан қочиб учиб кетиб, бир қари кампирнинг уйига қўнди. Кампир овқат тайёрлаётib лочинга кўзи тушди ва унга: «Эҳ бечора, сени боколмайдиганнинг қўлига тушиб қолибсан-ку. Қанотларинг ва тирноқларинг керагидан ортиқ ўсибди», деди.

Сўнг лочинни ушлаб, оёқларини яхшилаб боғлади. Қанотлари ва тирноқларини қисқартирди. Кейин эса олдига бир ҳовуч сомон қўйди.

Султон эса кун бўйи қушини қидирди. Кеч киргач уни ҳалиги кампирнинг уйида тупроққа беланиб ётганини кўрди. Султон лочинининг ҳолини кўргач, ачинганидан йиғлаб юборди. Сўнг унга: «Бизга бевафолик қилганинг учун шу ҳолга тушдинг ва сен бунга лойиқсан», деди.

Лочин эса қанотларини Султоннинг қўли томон чўзиб «Ҳа, мен шунга лойиқман», дейишга интиларди.

Эй дўстим! Жоҳилнинг муҳаббатини кампирнинг лочинга қилган муомаласидек бил.

ҚИШЛОҚЛИКНИНГ ҲЎКИЗИ

Қишлоқлик киши ҳўкизини молхонага боғлаб қўйган эди. Бир шер келиб ҳўкизни пақкос туширди-да, ўрнига ўзи ётиб олди. Қишлоқлик кеч тушгач молидан хабар олиш учун молхонага кирди. Кеч бўлгани учун шамчироқ билан ҳўкизини қидирар экан, унинг ўрнида ётган шернинг ўёқ-буёгини силаб қўйди. Шер: «Мени ҳўкизи деб ўйлаяпти. Агар бу ер бироз ёруғ бўлганида, қўрқувдан дир-дир титраган бўларди», деб ётарди.

Аллоҳ таоло шундай марҳамат қиласи: “Агар ушбу Қуъонни тоққа туширганимизда эди, унинг Аллоҳдан кўрққанидан титраб-қақшаб ва парчаланиб кетганини кўрар эдинг. Ушбу мисолларни одамларга келтиурмиз, шоядки улар фикр юритсалар” (Ҳашр сураси, 21- оят).

Аллоҳнинг муборак исмини ота-она, устозимиз ёки бошига бирорвдан эшиитиб, минг бир гафлат билан Унга илтижо қиласибиз. Аллоҳ лафзини тақлид қилмасдан, Унинг номининг ҳақиқатидан хабар топганимизда, шам каби эриб, гафлатимиздан ном-нишион ҳам қолмас эди.

ЭШАК КЕТДИ!

Сўфилардан бирининг йўли хонақоҳга тушди. Эшагини хонақоҳ молхонасига боғлаб, ем ва сувини берди.

Хонақоҳдаги дарвешлар жуда факир яшарди. На ўзлари учун ва на меҳмон олдига қўядиган егуликлари бор эди. Дарвешлар йиғилиб ўйланишди, охири, сўфининг эшагини сотишга келишдилар. Дарҳол уни бозорга олиб бориб сотиб, пулига ноз-неъматлар харид қилишди. Хонақоҳга келиб шамларни ёқиши. Атрофдагиларга: «Бу кеча зиёфат берилаяти», деб хабар тарқатдилар.

Мусофирга иззат-икром кўрсатиб, кўнглини олишди. Сўфи ўзига кўрсатилаётган хушмуомаладан севиниб ўтиради. Дарвешлар ҳурсандчиликдан жўшиб, кўнгилхушлик қилишарди. Зиёфат охирига етгач, чолғучи: «Эшак кетди, эшак кетди», деб бир ашула айта бошлади. Бошқалар ҳам унга жўр бўлдилар. Эшакнинг эгаси сўфи ҳам ҳаёжонга берилиб, улар билан бирга шу гапни такрорларди.

Тонгда туриб мусофири йўлга тайёрланди ва молхонага кирди. Қараса, эшаги йўқ. Сўфи: «Улар ҳазил қилишгандир», деб ўйлади.

Сўнг ёнига бир хизматчи келди. Ундан: «Эшагим қани?», деб сўради.

Хизматчи: «Бу қандай савол. Туни билан базм қилдингиз-ку. Эшагингиз сотилди. Зиёфат унинг пулига уюштирилди?!», деди.

Сўфи: «Мен уни сенга омонат топширган эдим-ку. Нега қарамадинг. Нега менга хабар бермадинг?!», деб сўроққа тутди.

Хизматчи жон куйдириб ўзини оклади: «Неча маротаба ёнингизга келган бўлсам, ҳаммадан кўра жўшиб, «Эшак кетди, эшак кетди» деб қўшиқ айтардингиз, ҳаммасидан хабардор бўлсангиз керак деб ўйладим!».

Сўфи энди нима ҳам десин? Барибир, эшагидан айрилиб бўлганди.

Кўзинг, ақлинг, қулогинг тозаланишини истасанг; кўзни юмган, ақлни тўсган, қулоқни ётиб қолган тамаъ пардаларини йирт. Тамаъ қилиб тақлидга эргашгани сабаб сўфи ҳам нурни ва нур зарраларини кўролмади. Овқат ҳирси, кўнгилхушилик ва зиёфат истаги ақлинни ҳакиқатни англашдан тўйсди.

ИККИ ҚУЛ

Султон икки нафар қул сотиб олди. Бири келишган, озода, тишлари оппоқ эди. Султон янги қулини ёнига чақириб, сұхбатлашди. Қул хожасининг сўровларига аниқ ва тўлиқ жавоб берди. Султон унга илтифот кўрсатиб, ҳаммомга жўнатди. Сўнг: «Иккинчи қул ҳам ёнимга келсин!», деб амр қилди.

Бу қул жуда хунук, тишлари қоп-қора, оғзидан нохуш ҳид келар эди. Сұхбатидан ҳам султоннинг кўнгли тўлмади. Лекин кўринишга қараб шошилиб ҳукм чиқармай, уларни яхшилаб синовдан ўтказишга қарор қилди. Оғзидан бадбўй қулига дедики: «Сен ақлли одамга ўхшайсан. Лекин олдинроқ ҳузуримга келган қул, мени сендан совутишга уринди, сен ҳақингда: «У яхши одам эмас, ўғри. Бўлмагур одамлар билан улфат ҳамда номуссиз киши», деб айтди», деди.

Қул: «Хожам, мен уни тўғрисўз одам деб биламан. Ёлғон сўзлаганига гувоҳим ҳам йўқ. Менинг ёмон жиҳатларимни кўрган экан, у кўрган айбларимни ўзим кўра олмабман», деди.

Султон қанча уринмасин, қулга дўсти ҳақида ёмон гап айттиrolмади. Аввалги қул ҳаммодан қайтгач, хўжайинининг ҳузурига чакирилди. Султон унга: «Жуда ҳам чиройли бўлиб кетибсан. Лекин минг афсуски, нариги шеригинг сен ҳақингда айтган хислатлари сенда бўлмагандар эди», деди.

Қул бирдан қизиши: «Султоним, у диёнатсиз мен ҳақимда нима деди?! ».

Султон: «У сенинг иккюзламчилигинг, кўринишда даво, аслида эса дард эканингни гапирди».

Қул бу гапларни эшитгач, жаҳлдан ақлини йўқотди. Қизариб-бўзариб, шеригининг орқасидан оғзига нима келса гапирди. Султон: «Мен иккингизни ҳам имтиҳон қилиб кўрдим. Билдимки, унинг оғзидан нохуш ҳид келса, сенинг рухингдан бадбўй ҳид таралар экан. Бундан кейин у сенинг хожанг, сен эса

унинг қулисан. Бор, унинг хизматида бўл!», деб буюрди.

Хуснли, аммо ахлоқсиз одам қадрсиздир. Бир инсоннинг юзи хунук бўлиши мумкин. Лекин ахлоқи гўзал бўлса, унинг оёқлари остида жон таслим қил! Зоҳирий шакл, гўзаллик ўткинчи, маъно олами эса боқий ва бебаҳодир.

ТАШНА БЎЛСАНГ, СУВГА ТАЛПИН!

Анҳор бўйида баланд девор бор эди. Нариги томонда ташналиқдан тинкаси қуриган одамнинг сувга етишишига шу девор тўсқинлик қиларди. Бечора сувсизликда қолган балиқдай талпинарди. Чанқоқликнинг зўридан девордан оша бир ғишт парчасини отарди. Унинг анҳорга тушиб чиқарган товуши, ошиқ учун ёр овозидек ёқимли эди. У яна ғишт олиб отишни бошлади. Ирмоқ: «Тош отиб мени безовта қилишдан сенга нима наф?», деди.

Ташна: «Бундан менга икки фойда бор. Сувнинг овозини эшитиш мен каби чанқоққа хуш ёқади. Мен олаётган ҳар бир ғишт деворнинг юксаклигидан қисқартиради ва сувга етишим тезлашади.

Борлиқ девори Роббул оламинга қурбат ҳосил қилишига, Унга сажда этишига тўсиқ бўлиб тураверади. Бу тупроқ бадандан айрилмагунча оби-ҳаётдан тўйиб-тўйиб ичиши имкони бўлмайди. Девор ортидагилардан ким қанчалик ташна бўлса, шунчалик жиҳдуду-жсаҳд билан девор гиштларини улоқтиришига киришади.

ЭРТАГА ҚИЛАМАН...

Бир одам йўл бўйига тиканли бута экарди. Тиканлар ўсиб йўловчиларга озор бера бошлади. Одамлар: «Сен тиконларингни йўлдан йўқотгин!», дейишди. Лекин у ҳеч кимни тингламади. Тиканлар кундан-кун ўсиб, ўтган-кетганинг кийимини йиртар, оёқларига қадалиб, қонатиб юборарди. Волий тиканли буталарни йўқотиши ҳақида амр қилди.

У: «Хўп бўлади, эртага барини юлиб ташлайман», деди.

Лекин бугун, эрта деб баҳона қилаверди. Тиканлар ўсиб, кўкариб, қувватланди. Волий: «Эй гапида турмайдиган инсон! Амримизни бажо келтир, сабримизни синама!», деди.

Тикан эккан: «Ҳавотир олманг, олдимизда ҳали кунлар кўп-ку. Ўшаларнинг бирида юлиб оламан», деб жавоб қилди.

Волий: «Сен буни эртага қиласман деяпсан-у, аммо тиканлар кун сайин қувватланишяпти. Уларни юлиб оладиган ҳам қарияпти, қувватдан қоляпти!», деди.

Сиз ҳар бир ёмон хулқни «тикон» деб билинг. Улар неча мароталаб оёқларингизни жароҳатлади. Унинг бадфеълиги дастидан инсоннинг ўзи ҳам, бошқалар ҳам озор чекади!

Кўлга болта олиб, ҳазрати Алий Ҳайбар қалъасининг дарвозасини ийқитгани каби ёмон хулқлар қалъасини қулатинг. Тиканлар ўрнига гул кўчатларини ундиринг, чаманзор барпо қилинг!

ЗУННУННИНГ ДЎСТЛАРИ

Зуннун Мисрий жазабага тушавериб, атрофидагиларни хавотирга солиб қўйди. Одамлар орасида «Зуннун жинни бўлиб қолибди» деган гап тарқалди. Унинг бу ачинарли ҳолидан хабар топган дўстлари дарҳол кўргани келишди. Зуннун уларни танимагандай, ким эканликларини сўради.

«Биз сенинг дўстларингмиз!», дейишди улар.

Зуннун уларни бақириб сўкиб кетди. Ўтирган жойидан сакраб турди-да, уларга қаратса тош ва тупроқ соча бошлади. Кўргани келгандар бирин-кетин қочишиб, девор ортига беркинишди. Уларнинг тум-тарқай қочишини кўрган Зуннун қаҳ-қаҳ отиб: «Эй ёронлар, «Биз дўстмиз», деганларнинг ахволини бир кўриб қўйинг!», деди.

Дўстдан келадиган азият, кўргулик, дўстга оғир келадими хеч? Дўстликнинг ўлчови дўстдан келган жафога сабрдир. Жафо ва изтироб ботин, дўстлик эса унинг зоҳирига ўхшайди. Дўст – олтин кабидир. Бало ва азият эса олов. Олтин оташда тобланганидагина соғ ҳолга келади.

ШАККОКНИНГ ЖАЗОСИ

Бир файласуф мадраса олдидан ўтаётган эди. Ичкаридан Қуръони каримнинг мана бу оятлари эшитиларди: “Сен: «Айтинг-чи, агар сувингиз ерга сингиб кетса, сизга ким осонгина топиладиган сувни келтиради?» деб айт” (*Мулк сураси, 30-оят*).

Файласуф ўзича: «Бунинг нимаси ажабланарли. Ўзимиз ерни қазиб, сувни чиқариб оламиз-ку?!», деб қўйди.

Кеч кирди, файласуф уйқуга кетди. Тушида забардаст бир йигит қаттиқ тарсаки тушириб, файласуфнинг икки кўзини кўр қилди ва унга: «Эй бефаҳм! Агар гапинг рост бўлса, кўзингнинг тубидан бир ёруғлик ва нур чиқариб кўр-чи!», деди.

Файласуф уйғониб ўрнидан турганида унинг кўзлари ҳақиқатан ҳам кўр бўлиб қолган эди.

Кошки, Роббимизнинг сўзларидан шак-шубҳа қилмаганида!

Кошки, тавба қилганда! Аммо файласуфнинг шаккоклиги туфайли қалбидаги тавба йўли ётилиб бўлган эди.

«Аллоҳим, Сенинг лутф ва қарамингга муҳтожман», деб нафс истакларига мутеълиқдан, гуноҳлардан тийилишига жиiddу жаҳд қилалий!

ҚУЛНИНГ САДОҚАТИ

Луқмон оддийгина қул бўлиб, ҳожаси уни жуда яхши кўрар, бирга тамадди қилишни хуш кўрар эди. Ҳожага бир қовун хадя қилинди. Қулларидан бирига Луқмонни чақириб келишни буюрди. Луқмон келганида ҳожаси қовундан бир тилим узатди. У соҳибининг икромини мамнуният билан қабул қилди. Қовундан яна кесиб берди, Луқмон иштаҳа билан еди. Ҳожа: «Луқмон қовунни жуда яхши кўрар экан», деб ўйлади ва бир тилим қолгунига қадар кесиб бераверди. Луқмон ҳам ҳар сафар қовунни иштаҳа билан ерди. Унинг иштаҳасини кўрган хўжайин қовун жуда ширин экан деб ўйлаб, охирги тилимдан тишлаб кўрди. Шу заҳоти унинг аччиқ таъмидан юzlари буришиб кетди. «Луқмон, қовун жуда аччиқ экан, уни қандай қилиб бунчалар иштаҳа билан единг?», деб сўради.

Луқмон: «Бир неча йиллардан буён қўлингиздан шундай totli-mazali таомлар едимки, бу ҳадянгизни «аччиқ экан», дейишга уялдим. Сиздан келган машаққатга фарёд қилгандан бурним ерга ишқалгани афзал. Лутф билан инъом этган бу қўлларингиздаги мазали қовунда қандай аччиқ таъм қолдириши мумкин?!», деб жавоб берди.

Севгидан аччиқ ширинга, мис олтинга айланади!

Севги билан кўчкилар тўхтаб барҳам топар!

Севгидан ўликка жон кирап!

Севгидан подиоҳ қул, қул подиоҳ бўлар!

Севгидан зиндон гулзорга, зулмат нурга алмашар!

Севгидан гинаю кудуратлар ўрнини шоду хуррамлик олар!

Севгидан йўлтўсар йўл кўрсатувчига айланаб, ҳидоятга йўл очар!

Севгидан хасталик сиҳҳат ва оғиятга айланади!

Севгидан қаҳр-газаб раҳм-шафқатга алмашади!

ЯХШИЛИК

Бир отлиқ йўл бўйида ухлаб ётган одамнинг оғзига илон кираётганини қўриб қолди. Илонни ҳайдашга ҳарчанд ҳаракат килса ҳам, эплолмади. Отдан тушиб, уни бор кучи билан уриб уйғотди. Одам калтакнинг зарбидан сапчиб турди. Отлиқ уни бир дараҳт тагига судраб, чириган олмалардан ейишга мажбурлади. «Менга нега зулм қиласяпсан, сенга нима ёмонлик қилдим?!», деб додлади.

Йўловчи уни сира тингламади ва сабабини ҳам айтмади. Чунки ҳақиқатни билганидан сўнг қўрқиб юраги ёрилиши мумкин эди.

«Энди мана шу адирда югурасан!», деб қамчиси билан уни савалашга тушди. Бечора додлаб қочарди. Югурга-югурга меъдаси шундай қоришлини, еган-ичганини қайт қилди. Илон ҳам чириган олмалар билан аралашиб оғзидан чиқиб кетди. Илонни қўрган одам унга нега бундай муомала қилаётганини англаб етди. Отлиққа раҳмат айтиб, хайр-дуолар қилди.

*Хайриҳоҳ инсонларнинг дўстлиги мана шундай бўлади.
Улардан келган машаққат қалбга роҳат, руҳга озуқадир.*

НОДОН ДЎСТДАН АҚЛЛИ ДУШМАН ЯХШИРОҚ

Айиққа баҳайбат илон ҳужум қилди. Айиқ жон таҳликасидан ўкираётганида, уни жасур бир йигит кўриб қолиб, илондан қутқарди. Айиқ ўз халоскорига миннатдорчиллик билдириди. Унинг ортидан эргашди, ҳеч айрилмас, орқасидан қомасди. Кунларнинг бирида йигит дардга чалинди. Айиқ эса дўстини сира ёлғизлатмай, ёнида ўтириб тузалишини кутарди. Бир йўловчи уларнинг ёнидан ўтаётиб, йигитга: «Биродар, бу нима ҳол. Айиқ билан нима алоқанг бор сени?», деб сўради.

Йигит унга бўлган воқеани тушунтириб, шундан буён айиқ уни яхши кўриб қолгани, содик дўст бўлиб юрганини айтиб берди. Йўловчи: «Сен айиққа бунчалик ишониб кўнгил берма. Нодоннинг дўстлиги душманнинг ёвлигидан ҳам ёмон. Ақлинг бўлса, уни ўзингдан узоқлаштири», деб маслаҳат берди.

Йигит: «Сен бу гапни бизга ҳасад қилганинг учун, дўстлигимизни кўролмаётганинг учун айтаяпсан. Сен айиққа эмас, унинг садоқатига боқ!», деди.

Нариги киши: «Менинг ҳасадим ҳам бу айиқнинг дўстлигидан яхшироқ. Ўрнингдан тур, кетдик, ҳайвонни инсондан устун кўрма. Ўзинг каби инсонлардан дўст қидир!», деди.

Лекин хаста йигит унинг гапига қулоқ солмасдан: «Эй ҳасадгўй! Кет бу ердан!», деб йўловчини ҳайдади.

Мусофир: «Мен билан кетсанг, ўзингга яхшилик қилган бўлардинг!», деб йўлида давом этди.

Бироздан сўнг хастанинг уйқуси келиб, ухлаб қолди. Айиқ bemornining boшида ўтириб, unga ozor beradigan pashshalarni haydaridi. Bir pasha yigitning yoziga k'uniib, ҳеч ketmай turaverdi. Ayiknинг jaхли chiqib, urmondan katta tosh olib keldi. Karasa, ҳалиги pasha dўstininig yozida y'eдан-buёққа vizillayapti. Ayik jaхл билан toshni unga қarab отди va

дўстини ўлдириб қўйди.

Аҳмоқнинг муҳаббати айиқникуга ўхшайди. «Нодон дўстдан ақлли душман яхшироқ», деб бежиз айтмаганлар.

ҚАРҒА БИЛАН ЛАЙЛАК

Бир куни чўлда қарға билан лайлакнинг ёнма-ён турганини кўриб ажабландим. Бу икки бошқа-бошқа қуш, қандай қилиб дўст бўлди. Ҳайратга тушиб улар томон яқинлашдим. Қарасам, иккиси ҳам чўлоқ экан.

Дард инсонларни бирлаштиради, бир-бирларини тушинишига йўл очади.

ҲАСТА ЗИЁРАТИ

Аллоҳ таоло Ҳазрати Мусога: «Мен хасталандим, кўргани келмадинг!», деди.

Мусо бу илоҳий хитоб қаршисида ҳайратда қолдилар ва: «Аллоҳим, Сен барча айб ва нуқсонлардан поксан! Эй Роббим, бу қандай ҳикматки, маъносини менга ҳам англатгин?!», деб ёлворди.

Аллоҳ таоло Мусонинг дуоларини қабул этиб: «Менинг хос ва танланган бандам хасталанди. Сен эса уни бориб кўришинг керак эди», деб марҳамат қилди.

*Аллоҳ билан боғланишини, Аллоҳга қурбат ҳосил қилишини истаган киши доимо Унинг хос дўстларининг ҳузурига ошиқсин!
Бемор бандаларининг ҳолидан хабар олсин, муҳтоҷ қулларига ёрдам берсин.*

ШАЙТОННИНГ НАЙРАНГИ

Султон саройда ухлаб ётарди. Халқнинг зиёратидан чарчаб, хизматкорларига саройни қулфлатиб, ҳеч кимни киритмасликни тайинлаган эди. Энди уйқуга кетган ҳам эдикى, уни кимдир туртди ва дарҳол беркиниб олди. Султон: «Мени ким безовта қилди экан. Дарвозалар қулфланган эди. Қандай кирган бўлиши мумкин?!», деб ётарди.

Ўрнидан туриб, қидира бошлади. Парда ортига беркингган шарпани кўриб: «Ҳой! Сен кимсан? Исминг нима?», деб сўради.

У: «Шайтонман», деди.

Султон: «Нега хонамга кирдинг, нега мени уйғотдинг, ростини айт, ёлғон гапирма?!», деб сўради.

Шайтон: «Намоз вақти бўляпти, туриб масжидга шошилишинг керак», деб жавоб берди.

Султон: «Сен ҳеч қачон, ҳеч кимга яхшилик қилмагансан, қилмайсан! Асл мақсадинг нима. Бу ҳолинг ўғрининг, уй эгасига: «Мен уйингга қоровуллик қиляпман» дейишига ўхшайди?!», деди.

Шайтон билан султон шу йўсинда бир қанча вақт тортишди. Шайтон, ниҳоят, ростига кўчди: «Уйғотишмнинг сабаби, намозга кеч қолганингда қаттиқ надомат чекиб йифлар, Роббингга ёлвориб, қўпдан-кўп савобга эга бўлардинг! Бунга йўл қўймаслик учун сени уйғотдим!», деди.

Султон: «Мана, энди тўғри гапирдинг! Сендан фақат шундай қинғир ишлар кутилади. Эй шайтон, сен ўргимчакка ўхшайсан. Фақат пашша овлай оласан, холос. Овора бўлмай, бу ердан даф бўл! Чунки сен факат ёмонлик даъватчисисан. Кўрсатган йўлинг гирдобдир. Сен одамларни савобдан, яхшиликдан тўсиш учунгина ҳаракат қиласан!», деди.

Ёмондан яхшилик кутши хомхаёлдан бошқа нарса эмас. Асли душман бўлгандан дўстлик чиқмайди. Инсон билан шайтон

орасида азалий адоварат бор. Алишер Навоий айтганлари каби:
«Одам била шайтон мухолафатин унутма. Ота душманин
ўзингга дўст тутма».

ЎҒРИНИНГ ОЁҚ ИЗЛАРИ

Бир одам уйига тушган ўғрини кўриб қолди ва уни тутиш учун орқасидан борди. Таъқибни сезган ўғри қочди, уй эгаси кувди. Икки-уч майдон айналиши. Уй эгаси қанчалик чарчамасин, ўғрини тутиш ниятидан воз кечмади. Ўғри ҳам ҳолдан тойиб, қўлга тушай деганида, кимдир нидо қилиб: «Кел-кел, ўғри бу ёқда!», дерди.

Уй соҳиби «У ерда бундан муҳимроқ бирор гап борга ўхшайди, уйим ва оиламга заар берабётган бўлишмасин», деб тўхтади. Чақирган одамнинг ёнига бориб: «Ҳа, нима бўлди, кимни айтяпсан?», деб сўради.

У: «Қара, мана булар ўғрининг оёқ излари. Сен шу излар ортидан бор, ўғрини ушлайсан», деди.

Уй соҳиби ғазаб отига миниб: «Эй нодон! Тутишимга бир баҳя қолганида уни қўйиб, сенинг гапингга кириб буёқка келдим. Сен эса менга унинг оёқ изларини кўрсатяпсан. Чапдан, ўнгдан деб, ўзингча йўл кўрсатмоқчи бўласан. Мен унга етай деганимда, чап-ўнгдан йўл борлигини ўйламаган эдим!», деди.

Ҳаётда ўзини доно санайдиган, аслида эса илмсиз, қўлидан иши келмайдиган кишилар учрайди. Улар ўзларини ақлли кўрсатиши учун ўринли-ўринсиз маслаҳат беришга уринадилар. Лекин сизни йўлдан қўйишидан, вақтингизни олишдан бошқага ярамайдилар. Модомики, тўғри йўлдасиз, гумроҳ кишилар сизни чалгитишларига йўл қўйманг!

Етишиши ва қовушиши учун, на изга ва на сўзга ҳожсат бор?!

ТҮРТ ҲИНД

Ҳиндистонлик тўрт нафар мусулмон намоз ўқиши учун масжидга киришди. Такбир тушириб, ибодатни бошладилар. Шу орада масжид муаззини келди. Ҳиндлардан бири намозда турганини унутиб: «Ҳой муаззин, аzonни айтдингми ёки ҳали вақтлими?», деб сўради.

Уни эшитган иккинчи ҳинд: «Эй биродар, жим тур! Намозда туриб гаплашдинг ва ибодатинг бузилди!», деди.

Учинчиси: «Сиз нега ундан хато қидирайпиз, ўзингиз ҳам намозда гапириб қўйдингиз. Унга берган ўгитга ўзингиз амал қилинг!», деди.

У сўзини тугатмай, тўртинчи намозхон: «Худога шукрки, сиз қилган хатони мен такрорламадим, намозимни бузмадим», деди.

Биронинг айбини кўриб гапириб юрадиган, айбдордан кўра кўпроқ хато қилган ҳисобланади. Ўз нуқсонини кўрганлар эса қандай ҳам яхшидирлар.

Бирордан айб қидирган унинг айбини ўзига сотиб олибди. Чунки инсоннинг нафс истаклари бу дунёда, руҳий ва маънавий истаклари гайб оламидадир. Модомики, сен нафсоний ва ҳайвоний хоҳишлиар ортидан эргашаётган бўлсанг, демак, бир қанча маънавий нуқсонларинг бор экан, малҳамни ўзингга сурт! Малҳам ва даво эса ўз айб-нуқсонларингни кўра билмоқдир.

БИРИНЧИ УНИ ЎЛДИРИНГ!

Ўғиз турклари бир қишлоққа ҳужум қилиб, бор-будларини тортиб олишди. Бир қарияни тутиб, қўл-оёғини боғладилар. Қария ёлвора бошлади: «Эй султон, эй улуғ инсонлар, мени нега ўлдирмоқчисиз. Ахир, мен бир факир одам бўлсам?!», деди.

Ўғиз туркларидан бири: «Мана бу дўстинг ўлимингни кўрсин. Токи ўзининг ҳам бошига шу қисмат тушишини ўйлаб, бизга яширган олтинларининг жойини айтсан!», деди.

Қария: «Сиз қўрқитмоқчи бўлган инсон мендан-да факир, камбағал!», деди.

Ўғуз турки: «У шундай кўриняпти холос. Лекин биз унда олтин борлигини билдик!», деди.

Қария яна ёлворди: «Агар, бизда олтин бор деб ўйлаётган экансиз, биринчи уни ўлдиринг. Мен қўрқиб сизга олтинларнинг жойини айтай!», деди.

Биз охирги уммат ўлароқ дунёга келдик. Нуҳ, Ҳуд ва Мусо каби қавмларнинг ҳалокати биз учун қаттиқ огоҳлантиришидир. Аллоҳ таоло уларнинг бошига тушигандарини эшиитиб ҳушёр бўлишга, Унга иймон келтириб, амрига итоат этишига чақиради.

ҚАРИЯНИНГ ШИКОЯТИ

Бир қария хасталаниб шифокор ҳузурига борди. Шикоят қила бошлади: «Ақлим тарқоқ, хаёлим жойида эмас», деди.

Шифокор: «Бу кексаликдан», деб жавоб берди.

Чол: «Кўз ўнгим қоронғилашади, яхши кўролмаяпман».

Шифокор: «Бу ҳам кексаликдан», деди.

Чол: «Елкам жуда қаттиқ оғрийди», деди.

Шифокор яна шу тарзда таскин берди: «Бу ҳам кексаликдан».

Чол: «Устига-устак, ошқозоним ҳам еганларимни ҳазм қилмаяпти».

Шифокор: «Кексаликдан».

Чол: «Нафас олиб-чиқарганимда ҳам қийналаяпман», деди.

Шифокор: «Кексаликдан ҳаммаси, инсон кексайганида юзлаб дардга чалинади», деди.

Қариянинг жаҳли чиқди: «Эй нодон! Сен бундан бошқа нарса билмайсанми/ Сенга ҳакимликда бошқа гап ўргатишмаганми/ Аллоҳ ҳар бир дардга дармонини бериб қўйганида, сен тўтига ўхшаб менинг барча дардларимга нега бир хил жавоб бераяпсан?!», деди.

Шифокор: «Бу ғазаб ҳам кексаликдандир!», деди.

Айрим кексалар бир оғиз гапни ҳам кўтаролмайди, газабланаверади. Лекин илоҳий ишиқ билан маст бўлган қария мутлақо бошқачадир. Унинг ичига маънавий топ-тоза руҳ мавжуд. Ҳақ таолога ошиқ бўлган одам кўринишда кекса, аммо ички ҳаётida навқирондир.

ЖАНОЗАНИ ҚАЕРГА ОЛИБ КЕТИШЯПТИ?

Бир бола отасининг тобути бошида фарёд чекиб: «Отажон, сизни қаерга олиб кетишмоқчи?! Воҳ, тупроққа, жуда ҳам тор, ғам-изтироб билан тўлган уйга олиб боришмоқчими?! У ерга на гилам тўшалган, на бўйра! На кундузи қуёш чиқади ва на кечаси чироқ ёнади! У жойда на бир қатра сув, на егуликдан асар бор! Эҳ, у ерда на эшик бор ва на йўл! На оғир кунда ёнингизда турадиган қўшнингиз бор!», дерди шўрлик.

Ғам-қайғудан йифлаб нола қиласкан, унинг сўзларини эшитган бир бола қўлидан тутиб турган отасига: «Отажон, қасам ичиб айтаманки, бу жанозани бизникига олиб кетишяяпти-ёв!», деди.

Отаси: «Бу нима деганинг, аҳмок?!», деб қўлини сиқиб қўйди.

Бола яна қатъий оҳангда: «Отажон! У боланинг санаб ўтган васфларига қаранг. Бизнинг уйимизнинг сифатлари-ку! Жанозани бизникига олиб боришяпти», деди.

Бунда бир нечта шиора бордир. Лекин дунё ботқогига ботган кимса буларни қандай кўрар, қандай билар?

Аллоҳнинг нуридан мосиво, зулматга чўмган қалб иймонсизларнинг ичидек тор ва қоронги. Ундаи қалб Аллоҳнинг завқидан, Унинг маънавий лутфидан маҳрум. Бундай кўнгил уйида на қуёш порлайди, на унинг эшиклари маърифат ва ҳақиқатга очилади. Сен учун бундай кўнгилдан мозор яхшироқдир. Ҳозирнинг ўзида зулматда қолган, нурсиз, тор қалбинг мозоридан чиқ-да, најсотга шошил!

УЧИНЧИ КИТОБ

НЕГА ЎЗИНГ АБГОР ҲОЛДАСАН?

Бадавий туясига икки қоп ортиб йўлида борарди. Йўлда бир одамга дуч келди. У: «Қопларда нима бор?», деб сўраб қолди.

Бадавий: «Бирида буғдой, иккинчисида қум», деб жавоб қилди.

Киши ажабланди ва: «Нега бирига буғдой, иккинчисига қум солиб олдинг?», деб сўради.

Бадавий: «Менинг бир қопгина буғдойим бор эди. Баравар бўлсин деб, бир қопга қум тўлдириб, иккисини туямга юклаб олдим», деди.

Йўловчи: «Буғдой солинган қопингни иккига бўлсанг, туюнинг юкини ҳам енгиллатган бўлардинг?!», деди.

Бадавийга унинг фикри ёқиб тушди: «Офарин сенга, файласуф экансан! Эй оқил инсон, нега ўзинг бундай абгор аҳволда пиёда кетаяпсан?», деб сўради.

Содда бадавий файласуфнинг ёлғиз ўзи пиёда юришини истамасди. Унга: «Эй файласуф, бундай ақл-фаросат билан сен ё султонсан, ёки вазир, тўғрисини айтавер?!», деди.

Файласуф: «Иккиси ҳам эмасман. Аҳволимдан кимлигим маълум», деди.

Бадавий: «Ундей бўлса, нечта тuya, нечта хўқизинг бор?», деб сўради.

Файласуф: «На униси бор, на буниси. Саволларинг билан мени қийнама!».

Бадавий: «Ҳеч бўлмаса, қанча пулинг бор, шуни айт. Инсонларга яхши насиҳатлар қиласан. Сенда дунёдаги мисларни олтинга айлантирадиган илм бўлса керак. Сенга ўхшаган инсонларнинг маҳорат ва сир-асорори ичида?!», деб қистовга

олди.

Файласуф: «Эй бадавий, бор-йўғим қорнимни тўйдириншга ҳам етмайди. Шунинг учун юпун, оч-наҳор юрибман. Ким бир бурда нон берса, унинг хизматида бўламан», деди.

Бадавий баланд овоз билан: «Коч, мендан нарироқ тур! Сенинг касринг менга ҳам юқмасин. Қопларимнинг бирида кум, иккинчисида буғдой бўлиши сенинг ҳикматингдан яхшироқ. Менинг қалбим илоҳий лутф ва маънавий қутлар билан тўладир. Қалбимда Аллоҳдан қўрқиш ва Унинг амрларига бўйинсуниш истаги доимо бор», деди.

Баъзан ахлоқи бузук “билимдон”лар ўзларидан юқори мансаб ва ўринларга кўтарилиб қолади. Сўнг турли ҳийлалар билан Ҳақнинг таълимотларини ўзгартириб, қориштириб юборади. Ақлга сизмайдиган ишлар ортидан чопади. Асл яхшилик ва маънавий куч бўлган сабр-тоқат, кечиримлилик ва сахийликнинг илдизига болта урмоқчи бўлади.

МАНМАН СИЧҚОН

Сичқон таянинг нўхтасидан¹ тишлаб олиб етаклаб кетарди. Туя босик ва юмшоқлигидан унинг орқасидан эргашарди. Сичқон: «Ўзимнинг паҳлавонлигимни билмай юрган эканман», деб керилди. Туя эса «Мен хозир сенга кўрсатиб қўяман», дерди ичида. Юра-юра бир анҳор қирғогига етишди. Сичқон қўрққанидан анграйиб қолди. Унинг ҳолини кўрган туя: «Эй тоғу тошларда менга йўлбошловчи бўлган сичқон, нега тўхтадинг. Қани, кетдик, бу ерда қолишимиз ярамайди!», деди.

Сичқон: «Дўстим, сув жуда ҳам чуқур, чўкиб кетаман», деди.

Туя: «Кўрайликчи, қанчалик чуқур экан», деб, анҳорнинг ўртасига борди. Кейин: «Эй кўрсичқон, бунинг чуқурлиги тиззабўйи, холос. Нимасидан қўрқасан?!», деди.

Сичқон: «Сенинг тиззанг қадар келмаган сув менинг бўйимдан юз баробар баланд», деб ожизлигини тан олди.

Туя: «Ҳолинг шу экан, тарбиясизлик қилиб, ҳаддингдан ошганинг нимаси? Бундан кейин ўзингга ўхшаган сичқончалар билан бўйлаш. Сен тяга бас келаман деб овора бўлма!», деди.

Сичқон пушаймон бўлиб: «Мени шу сувдан ўтказиб қўй», дея ёлворди.

Туя унга ачинди ва: «Қани, елкамга чиқиб ол. Бу анҳордан ўтиш менинг ишим», деб уни дарёдан ўтказиб қўйди.

Гурур илонини дарҳол ўлдиринг. Йўқса, у аждарга айланиб, сизни маҳв этади. Минг афсуслар бўлсинки, ҳар ким ўзининг нафс ва ғурур илонини бир чувалчангдек кўради. Оқил киши эса ўзигаadolat кўзи билан қарайди ва ҳолини яхши англайди.

¹ Туяни бўйнига солиб, қўл билан ушлаб тортиб юрадиган эгов, ип.

www.ziyouz.com kutubxonasi

ЎРИНСИЗ ТОРТИШУВ

Бир киши тўрт нафар фақирга: «Мана бунга хоҳласангизни сотиб олинг», деб пул берди.

Улардан бири форс эди. Ўз тилида: «Бу пулга «ангур»² сотиб олайлик», деди.

Иккинчиси араб эди, у: «Бунга «инаб»³ оламиз, жуда егим бор», деди.

Турк: «Мен ангур, инаб хоҳламайман. Яххиси, узум олайлик», деди.

Румлик эса: «Тортишишни бас қилинг, бу пулга «истафил»⁴ оламиз», деди.

Бир-бирлари билан тортишиб, уришиб кетишли. Ниҳоят, турли тилларни биладиган киши келиб, уларни ажратди. Ҳар бирини тинглади. Сўнг пулга узум харид қилиб: «Сиз истаётган нарса мана шу эмасмиди?», деб сўради.

Улар бир овозда: «Ҳа, шу-шу!», дейишли.

Жоҳилликлари сабаб истаклари бир эканини ажратма олишимади.

Минг афсуски, бу каби ўринсиз тафриқа ва жсанжсаллар ҳали ҳамон барҳам топгани йўқ. То бир-бirimizни англамагунимизча, ечим топмайди.

² Ангур – Форсча сўз бўлиб, «узум» маъносини беради.

³ Инаб – Араб тилида «узум» деганидир.

⁴ Истафил – Юончча бу сўз ҳам «узум» маъноси англатади.

ФИЛ БОЛАСИГА ТЕГМАНГ!

Хиндистонлик донишманд узоқ сафардан оч ва юпун ахволда келган мусофиirlарни кўриб, уларнинг ҳолига ачинди. Уларга: «Узоқ ва заҳматли сафардан яхши-ёмон кунларни бошдан кечириб келаяпсиз. Сафар давомида фил болаларига дуч келишингиз мумкин. Дўстларим, ҳар қанча оч қолсангиз ҳам, ўт ва япроқларга қаноат қилинг. Лекин фил болаларига зинхор тегманг! Филлар болаларини қаттиқ қўриқлади. Мен сизни огоҳлантирдим, буни аслу унутманг!», деб панду-насиҳат қилди.

Мусофиirlар донишманд билан хайрлашиб, йўлда давом этдилар. Узоқ юрмасларидан, бир семиз фил боласига дуч келдилар. Донишманднинг огоҳлантирганини унутиб, оч бўридек унга ҳужм қилишди. Ораларидан бири дўстларини бу ишдан қайтарди. Дўстлари унга қулоқ осмай, фил боласини тутиб, сўйиб еди. Филни тутишдан қайтарган одамгина ўзини тийди. Чунки у донишманднинг гапини эсидан чиқармаган эди.

Қорни тўйган йўловчилар узаниб, уйқуга кетишиди. Оч одам эса уйғоқ эди. Баҳайбат филнинг чопиб келаётганини кўриб, ўрнидан туриб қочди. Фил уни тутиб олди. Оғзини уч марта хидлаб кўрди. Боласининг ҳидини топмагач, унга тегмади, соғ-омон кўйиб юборди. Кейин ухлаб ётганлар томон юрди. Ҳар бирининг оғзини ҳидлади. Сўнгра хартуми билан бирма-бир даст кўтарганча ерга уриб, барини ўлдирди.

Эй ҳаромдан тап тортмаётган гоғил инсон! Билгинки, сен фил боласини еясан. Ҳаром луқманинг ҳиди дунёю-охиратда инсонни, шубҳасиз, шарманда қиласди.

БЕГУНОҲ ТИЛНИНГ ДУОСИ

Аллоҳ таоло Ҳазрати Мусога: «Менга гуноҳ қилмаган, фахш сўзламаган тил билан дуо қил ва паноҳ тила!», деб буюрди.

Ҳазрати Мусо: «Ахир менда ундей тил йўқ-ку, Сенга қандай қилиб гуноҳ қилмаган тил билан дуо қилайин?!», деб илтижо қилиб сўради.

Аллоҳ таоло: «Ундей бўлса, Бизга бошқаларнинг тили билан дуо қил. Чунки сен бошқалар тили билан гуноҳ қилмагансан, уларнинг тили сенга тозадир. Яъни, шундай яшаб, шундай амаллар қилки, доим одамлар сени дуо қилсинлар», дея марҳамат қилди.

Аллоҳнинг зикри ила машғул бўлиши – энг покиза ҳолатдир. Бу поклик ўз жисолосини таратиши билан, қуёши порлаганида тунги зулмат қандай чекинса, гафлат ва маъсият зулмати ана шундай чекинади. Аллоҳ таолонинг муборак лафзи тилга олинганида, на бир нопоклик ва на ғам-ташивишдан асар қолади.

Яратганинг зикри ила машғул бўл ҳамда олимлар, зокир ва обид бандаларнинг, мазлум ва йўқсилларнинг дуоларини олишига шошил! Уларнинг сен учун покиза тиллари воситасида Яратганга илтижо қил, шоядки најсот топсанг!

СЕН ЭСЛАСАНГ, ХУДО ЭСЛАЙДИ

Бир киши тунда Аллоҳнинг зикри билан машғул ўтиради. Унинг ёнига шайтон келиб: «Қачондан бери «Аллоҳ, Аллоҳ» дейсан, лекин У сендан: «Нима истайсан, эй бандам?!», деб сўрадими. Бу ҳолингда яна қачонгача давом этасан. Сенга жавоб бўлмаяпти, кўрмаяпсанми?!”, деди.

Шайтон фитнасига учган кишининг ихлоси сўнди, қўнглига шубҳа тушди. Зикрдан чалғиб, бошини ёстиққа қўйганча ухлаб қолди. Тушида чиройли чаманзорда Ҳизрни кўрди. У: «Нега Аллоҳни зикр қилишдан воз кечдинг. Нега Унинг зикридан пушаймонлик тортяпсан?», деб сўради.

Зокир: «Мен шунча пайтдан бери Аллоҳни зикр қилиб келдим. Лекин ҳозиргacha менга жавоб бўлмади. Аллоҳнинг эшигидан ҳайдалишдан қўрқаяпман», деди.

Ҳизр: «Сенинг «Аллоҳ» дейишинг, Аллоҳнинг «Сўзла, эй қулим» дейишидир! Ўз номини зикр қилиш завқу шавқини қўнглингга солган ва Унга ёлвориш эҳтиёжини сенга ҳис қилдирган ҳам Ўзидир! «Роббим» дейишинг, Унинг «Қулим» дейишидан бошқа нима бўлиши мумкин?!», деди.

Ҳақиқатдан бехабар кўнгил Яратганнинг зикридан, дуо қилишдан бебаҳра. «Эй Роббим» дейишига изн йўқ, унга Аллоҳни зикр қилишдек завқ ато этилмаган! Бирор мусибат онида ҳам оламлар Роббига юзлана олмайди, чунки унинг оғзига ҳам, қалбига ҳам маънавий қулф урилгандир!

ДЎСТЛИККА ХИЁНАТ

Қишлоқлик ва шаҳарлик йигитлар дўст тутинбди. Қишлоқлик қачон шаҳарга борса, дўсти ундан ёрдамини аямасди. Қишлоқлик унинг дўконида ўтирас, дўсти дастурхон ёзарди. Шаҳарлик йигитга дўсти: «Эй дўстим! Сен қишлоққа бориб, табиат кўйнида кўнгил ёзиб келганмисан ҳеч. Мевалар пишган паллада бутун оила жам бўлиб бизнинг қишлоққа боринг. Мен ҳам сенга икром кўрсатиб, хизмат қиласай?!», деб таклиф этди.

Шаҳарлик бу таклифга жавобан ваъда бериб кутилди. Орадан яна саккиз йил ўтди. Қишлоқлик ҳар йили шаҳарга келар, дўстиникида меҳмон бўлар, «Қачон бизниги борасиз. Яна бир қиш ўтди-я», деб гина қиласарди.

Дўсти турли баҳоналар топиб: «Бу йил фалон ердан меҳмон келган, фалон ишим бор, кейинги йилга насиб бўлса», деб уни ишонтирас эди.

Қишлоқлик ҳар гал лайлакдек келиб, шаҳарликнинг томига кўнар ва одатий таклифини қилишдан воз кечмасди. Дўсти эса доимгидек унга ёрдам кўлини чўзар, ҳатто мол-мулкидан унга улуш ҳам ажратиб турарди.

Қишлоқлик бу келишида дўстиникида уч ой меҳмон бўлди. Ундан одатдагидек иззат-икром кўрди ва уялганидан: «Дўстим, ваъда берган эдинг. Сен мени шунча пайтдан бери алдаяпсан. Қачон бизниги борасан ўзи?!», дея қишлоғига йиғлагудек бўлиб кетди.

Қатъий таклифга оила аъзоларининг қистови ҳам кўшилгач, шаҳарлик йигит дўстиникига боришга қарор қилди. Болалари «Қишлоққа борамиз, мазза қилиб айланиб келамиз!», деб хурсанд бўлишди. Сўнг сафар тараффудуни кўриб, йўлга отланишди. Сафар завқидан гўё жаннатга кетаётгандек эдилар. Лекин манзил узоқ эди, йўл машаққатлари ортиб бораарди.

Баъзида адашиб бошқа овулларга кириб қолишарди. Ўзлари очнахор, уловлари ҳам сувсиз, емсиз азоб тортардилар. Сўрай-сўрай, нихоят, дўстининг қишлоғини топиб боришидни. Лекин дўсти меҳмонларга умуман эътибор қилмади. Шахарлик йигит хайрон бўлиб: «Дўстим! Мана, таклифингга биноан келдик», деди.

Мезмон уларни умрида биринчи маротаба кўриб тургандек: «Сен кимсан, мен сени танимайман?!», деди.

Шахарлик: «Мен фалончи дўстингман, ахир!», деди.

Қишлоқлик: «Балки тўғри гапираётгандирсан. Лекин мен қаердан биламан, қандай одамсан, покми-нопок, тўғрими ё эгри?», деди.

Шахарлик, ноилож, унга кўрсатган мусофирипарварлиги, илтифотларини эслатди. Аммо дўсти: «Мен на сени танийман ва на исмингни биламан», деб қутилишга уринди.

Мусофирилар роппа-роса беш кун унинг остонасида қолиб кетди. Бешинчи кеча осмонда булат тўпланди. Сўнг шаррос ёмғир қуиди. Меҳмонлар ортиқ чидолмай, эшикни тақиллатишиди.

Қишлоқлик уйидан зўрға чиқиб: «Ҳа, нима истайсан?!», деб бақирди.

Шахарлик: «Эшигинг олдида беш қундан бери беш йиллик заҳмат чекдик. Ҳеч бўлмаса, мана бундай ёмғирли оқшомда бизга бошпана бер, кошки бу сен учун охиратда савоб бўлса!», деди.

Қишлоқлик: «Нарироқда бир кулба бор. У ерни кечаси билан бўридан ҳимоя қилсанг, сенга ўша ерда қолишингга рухсат бераман», деди.

Шахарлик, ноилож, таклифга рози бўлиб: «Сен менга камон билан ўқ бер», деди.

Шахарлик ва оиласи кулбачага кўчиб ўтишиди. Тор хонада минг азобда ётишарди. Харобада қурт-қумурскалар уларни

бўридан баттар талашди. Хўрликдан жонлари бўғзига етганда, югуриб келаётган бир бўри шарпасини кўрди. Шаҳарлик камондан ўқ узди. Ҳайвон қаттиқ инграган овоз чиқарди. Унинг товушини қишлоқлик уйидан туриб эшишиб, дарров югуриб келди. Кўлларини тиззасига уриб: «Эй воҳ! Сен нима қилиб кўйдинг. Бечора эшагимни ўлдирибсан-ку?!», деди.

Шаҳарлик: «Синчиклаб қара, қоронғи бўлгани учун яхши кўролмаётгандирсан. У аниқ бўри эди», деди.

Қишлоқлик: «Мен ўз эшагимнинг ҳанграшини жуда яхши танийман! Йигирмата эшак орасидан ҳам унинг овозини bemalol ажрата оламан», деди.

Бу гап шаҳарлик меҳмонга жуда оғир ботди. Унинг ёқасига ёпишиб: «Эй хийлакор аҳмоқ! Сен зим-зиё кечада эшагингнинг ҳанграшини танибсан-у, наҳотки, ўн йиллик дўстингни танимадинг?», деди.

Дўст танлаши ўта мушқул вазифа. Нафсининг дўсти, аниқроғи, нафсининг қули бўлган нокаслардан вафо кутишининг оқибати афсус-надоматдан ўзга нарса келтирмайди.

Тадбир ва эҳтиёт шуки, ёмонга қарши ёмон гумонда бўлмогингдир. Бу билан муқаррар зиёндан қутиласан. Ҳикояда киши пухта, тадбирли ва ҳушёр бўлиши зарурлиги уқтирилмоқда.

ЛОЧИННИНГ ҒОЗЛАРГА ТАКЛИФИ

Лочин ғозларга қарата: «Сувдан чиқиб, атрофнинг гўзаллигидан ҳам баҳра олсангиз-чи!», деб таклиф қилди.

Ғозлардан бири: «Эй лочин, сен биздан нари тур. Сув бизнинг таҳлика ва хавфлардан химояланадиган қальъамиздир. Сувдан чиқсак, минг бир хатарга учрашимиз тайин. Сен айтаётган ям-яшил қир-адирлар ўзингга буюрсин!», деб жавоб қилди.

Гозлардан мурод Яратганнинг кўрсатмалари асосида ҳаёт кечираётган иймон аҳлиниң тимсолидир. Лочин эса мўминларни тақво қалъасидан чиқариб, маъсиятга, фасодга чақирадиган нафс, шайтон ҳамда шайтон малайларининг васфиидир.

МАЖНУННИНГ ИТИ

Мажнун бир итни эркалаб, шарбат ичириб ўтирарди. Ундан: «Бу қилаётган нодонлигинг нимаси, ит нопок-ку?!», деб сўрашди.

Мажнун шундай жавоб берди: «Бу кучук Лайлининг кўчасининг қоровулидир».

Эй дўстлар! Шакл ва суратдан ошиб, маъно оламига кирсангиз, у ернинг жаннат гулзори эканини кўрасиз. Ўз суратингиз ва мавҳумлигинизни йиртиб ёқинг, яъни, бутларнинг боши бўлган нафсга бўйин сунишдан қутилинг.

ШАҒОЛНИНГ ДАЛЬВОСИ

Шағол айланиб юраркан, бўёқ идишига йиқилиб тушди. Қанотлари ранг-баранг бўлиб чиқди. Қуёш нурида яна ҳам порлаб товланарди. Қанотларидаги мовий, яшил, пушти ва сарик рангларни кўриб, шағоллар ёнига югурди, ўзини кўз-кўз қила бошлади.

Улардан бири: «Бу қандай найранг? Ўзингни ўзинг рангларга бўяб, кўзбўямачилик қиляпсанми?», деб сўради.

У: «Сен менга яхшилаб қара. Менинг гулзор каби турфа рангларимга бок. Умрингда менга ўхшаган гўзал қушни кўрганмисан? Бундан кейин менга «Шағол» деб юрманг. Бу каби гўзаллик ҳеч шағол зотида бўлиши мумкинми?», деб гурурланди.

Шағоллар: «Унда сени нима деб чақирамиз?», дея сўрашди.

«Муштарий юлдузи каби порлаган товус қуши денг!», жавоб берди шағол.

Улар: «Товус жуда нозик қадамлар ташлаб, оҳиста юради. Бу сенинг ҳам қўлингдан келадими?», дейишиди.

Шағол: «Йўқ, улар каби юролмайман», деди.

Шағоллар: «Ҳеч бўлмаса, улардек сайрай оларсан?».

Шағол: «Йўқ».

Шағоллар: «Эй соҳтакор! Сен товус эмассан! Товус ранглари унинг ҳидидан таралади. Сен сохта бўёқларни чаплаб, қуруқ иддао билан қандай қилиб товус бўлиб қолишинг мумкин?!», деб ундан нари кетишиди.

Шағол – зоҳирини безаган, кўринишида чиройли, аммо ботиний гўзалликдан бебаҳра, ичидан чириган, нафсига тобе кимсаларнинг тамсилидир. Солиҳлардек кўринишига уринган ва тилини орифларнинг сўzlари билан безаб: “Мен комил инсонман. Сизни ҳақиқатга етаклайман”, деб даъво қиласидиган сохта шайхларнинг образидир.

МҮЙЛАБИНИ ЁГЛАГАН КИШИ

Бечораҳол киши бир парча думба ёғи топиб олди. Ҳар куни эрталаб у билан мўйлабини мойлар, сўнгра туриб бадавлат инсонларнинг ёнига кетар ва: «Мен бугун фалон ерда бўлдим, ёғли-ёғли таомлар едим», деб мақтанар, мойдан ялтираб турган мўйлабини силаб-силаб қўяр эди.

Корни эса шу чоғ: «Сенинг ёлғонларингдан бизнинг иштаҳамиз очилди. Сен айтган нарсаларнинг ҳидини хидлаганимизда ҳам жон дердик!», дерди.

Бир куни мўйлабига суриб юрган ёғ парчасини мушук олиб қочди. Отасидан қўрқиб мушукни роса қувлаган болалар ҳам уни тутолмади. Кенжা ўғил ранг-рўйи ўчиб, одамларга мақтаниб турган отасининг олдига югуриб келди. Ҳансираганча: «Отажон, сиз мўйловингизга сурадиган ёғни бир мушук ўғирлаб кетди. Ортидан қанча югурмайлик, бари-бир тутолмадик!», деди.

Одамлар аввалига ажабланиб, кейин оҳиста кулиб қўйдилар. Сўнг йўқсилнинг қорнини тўйдиришди. У тўғри юриб, рост гапиришнинг фарқини тушиниб етди. Фууруга берилиб, ўзини катта тутишдан воз кечди.

Ёлғончилик, соҳта раёсат инсонни шарманда қиласди. Кибр ва ғуурдан узоқ туриб, камтарин бўлсанг, мақсадинга янада осонроқ етасан. Аллоҳ бу хислатинг сабабидан сени азиз қилиб қўяди.

ФИЛ НИМА?

Хиндлар фил олиб келиб, қоронғи хонага боғлаб қўйди. Олдин филни ҳеч қўрмаган одамлар тўпланди. Хона жуда қоронғи бўлгани учун филни кўз билан кўришнинг имкони йўқ эди. Улар қўллари билан пайпаслаб, филнинг нима эканини билишга уринарди.

Бирининг қўли унинг хартумига тегиб: «У сув хартумига ўхшайди», яна бошқаси қулоғини ушлаб: «Фил елпигичга ўхшар экан», деса, филнинг оёғини ушлагани уни ўзича устунга ўхшатди. Бири унинг белини ушлаб: «Фил қояга ўхшар экан» деди.

Ким филнинг қаерига тегинган бўлса, шунга кўра таърифлар, бир-бирига зид тасаввурларга боришар эди. Агар улар шам ёқиб хонани ёритишганида, кўрганлари айни бир нарса бўлиб чиқар эди.

Ҳақиқатни бор бўйида кўра олмаётгани учун одамлар ҳали-ҳануз талашиб-тортишиадилар. Бу низолар қон тўкишигача бориб етмоқда. Жаҳолат зулматини ёритадиган маърифат нурига қанчалар муҳтожмиз!

ТАРСАКИННИНГ ОВОЗИ

Бир киши ёнидаги кимсанинг юзига тўсатдан қаттиқ тарсаки тортиб юборди. Унинг бундан жаҳли чиқиб, тарсаки туширганни уриб-тепа кетди. Наригиси эса: «Тўхта, тўхта! Олдин саволимга жавоб бер, кейин нима қилсанг қиласвер. Сени урганимда бир овоз чиқди. Хўш, у овоз менинг қўлимдан чиқдими ёки сенинг юзингданми?», деб сўради.

Тарсаки еган одам: «Оғриқ у овознинг қаердан чиққанини ўйлашга имкон бермаяпти. Қаердан чиққанини ўзинг ўйлаб кўр!», деди.

Кейин эса ҳалиги одам аввалгидан ҳам қаттиқроқ тарсаки туширди.

Бирор инсоннинг оёғига тикан кирса, диққат-эътибори у ерга кетиб, бошиқа нарсани ўйлаш қобилияти тўсилиб, ўйлай олмайди. Эътиқод, иймон масалаларига оид турли мазҳабдаги уламоларнинг баҳсларида ҳам шунга ўхшаган мавзулар ўртада бўлган. Бу баҳслар «Юзга урилган тарсакининг овози урганинг қўлидан чиқдими ёки урилганнинг энгасиданми?», деган савол каби маъно ва мантиқсиздир. Ҳазрати Мавлоно бу ҳикоялари билан мана шу каби бефойда баҳс-мунозараларга ишора қўлмоқдалар.

ДОМЛА ҚАНДАЙ ХАСТАЛАНДИ?

Талабалар муаллимни хушламасди. Ҳар куни бир дунё вазифалар олавергач, зерикиб, устозни ёқтирмай қўйишганди. Барчаси тўпланиб: «Бир-икки кунга бўлса ҳам, шу домладан қандай қутилсак?», деб маслаҳатлашишди.

Бир бола: «Шу домла бир неча кун уйида касал бўлиб ётсади, биз ҳам қутилардик», деди.

Бирининг ақлига эса домласига ҳазил қилиш фикри туғилди ва дўстларига: «Эртага домла келганида ёнига бораманда: «Устоз, рангингиз сарғайиб кетибди, тобингиз йўқ шекилли. Бу ҳолат ё совуқликдан, ёки касалликдан юзага келади?!» дейман. Кейин эса домла шубҳага тушиб, ваҳима қила бошлайди. Шубҳаланган ва ваҳима қилган одам ақлини йўқотади. Сўнгра сиз ҳам менга ўхшаб: «Тинчликми, устоз, нима бўлди сизга, тузукка ўхшамаяпсиз?!», дейсиз. Уч тўрт киши бошлаб берамиз. Навбат-навбат ҳаммамиз шундай деб сўраймиз. Домла касал бўлганига ишонади», деди.

Барчаси бу режани маъқуллашди. Эртаси куни у домласига салом бериб: «Тузукмисиз, домла, юзингизда ранг қолмабди, сарғайиб кетибсиз?!», деб сўради.

Муаллим: «Тузукман, ўтири жойингга! Бундай гапингни гапирма менга!», дея қизишли.

Домла касаллигини тан олмади, лекин қалбига шубҳа тушиб улгурганди. Кейин бошқа талаба келди. У ҳам устознинг кўриниши яхши эмаслигини айтгач, домланинг шубҳаси орта бошлади. Талабаларнинг барчаси бирма-бир келиб, унинг касал ёки касал эмаслигини сўради. Ваҳима қўрқувга айланди. Ўзини ёмон ҳис қила бошлади. Туриб уйига йўл олди. Талабалари ҳам устозга эргашди. Домла ичидан: «Нега аёлим эрталаб касал бўлганимни кўра-била туриб мени ишга юборди? Сўнги пайтларда, ҳол-аҳволимга ҳам қизиқмай қўйди. Балки мендан

кутилишни хоҳлаб юргандир», деб гумонсирай бошлади.

Шундай ёмон хаёллар билан уйига келиб, эшикни қаттиқ очиб кирди. Аёли: «Тинчликми, нега вақтли қайтдингиз?», деди.

Домла: «Аҳволимни кўрмаяпсанми?! Ҳатто бегоналар ҳам менга ачиниб қарамоқда!», деб бакира кетди.

Аёли: «Аҳволингиз туппа тузук-ку!», деди.

Домла бу гапдан янада қизиши: «Халигача ўжарлик қилиб гап талашиб турибсанми, мендаги ўзгаришни, титрашимни кўрмаяпсанми?!», деди.

«Бекорга ваҳима қиляпсиз, холос», деди хотини.

Домла: «Тезда жойимни тайёрла, ётаман. Бошим оғрияпти!», деди.

Хотин ҳайратланиб қараб қолгач, эри яна ўшқириб берди.

Домла кўрпа-тўшак қилиб ётиб олди. Талабалар эса бир чеккада воқеани диққат билан кузатар, бироз виждонлари қийналиб: «Бари бизнинг айбимиз!», деб қўйишишарди.

Бари ғалвани бошлаган талаба: «Дўйстлар, китобларимизни баланд овозда ўқийлик!», деди.

Болалар баланд овозда китоб ўқишини бошлаганида, у овозини кўтариб: «Дўйстлар, бундай ўқишингиз устозимизни безовта килаяпти!», деди.

Домла ҳам унинг гапини тасдиқлаб: «Қани, уйингизга боринг, бошимнинг оғригини кучайтираяпсиз!», деб шогирдларига рухсат берди.

Талабалар хайрлашиб, уй-уйларига ошиқди. Ота-оналари: «Дарс вақти бу ерда нима қилиб юрибсиз?», деб сўрашди.

Улар: «Домламиз касал бўлиб қолдилар!», дейишиди.

Ота-оналар эртаси куни домлани кўргани борганда, домла ҳақиқатдан касал бўлиб, ранги сарфайиб, қийналиб ётарди.

Дарҳақиқат, ақлнинг оғати ваҳима, васваса ва бўлмағур нарсаларга ишонишададир.

ЗАРГАРНИНГ ЖАВОБИ

Бир киши заргарга: «Менга тарозингни бериб турасанми, олтин тортиб олмоқчи эдим?», деб сўради.

Заргар: «Менда элак йўқ, сенга элак беролмайман», деди.

Киши: «Сен ҳазиллашяпсанми, мен элак эмас, тарози сўрадим?!», деди.

Заргар: «Менда супурги йўқ, супурга ҳам беролмайман!», деди.

Киши бироз қизиши: «Қандай элак, қанақа супурги, мен сендан тарози сўрайпман!», деди.

Заргар: «Отахон! Сиз кекса инсонсиз. Олтинни тарозида тортаётганда қўлларингиз титраб тўкиб қўйишингиз мумкин. Тўкилган олтинларни йиғиб олиш учун мендан супурги сўрайсиз. Кейин эса уни тозалаб олиш учун элак сўрайсиз. Шунинг учун сизга олдиндан айтаяпман, менда элак билан супурги йўқ!», деб жавоб берди.

Оқиллар ҳушёрликни қўлдан бой бермай, турли эҳтимолларга қарши олдиндан чора кўрадилар. Жоҳил эса охирида фарёд қиласи. Сен олдиндан ишининг оқибатини кўр, сўнгра Қиёмат куни пушаймон бўлиб қолма!

“НОГОРА ОВОЗИНИ ЭРТАГА ЭШИТАСАН!”

Коронги тунда ўғри бир уйнинг деворини бузатгандан эди. Уй эгаси ҳали уйқуга кетиб улгурмаганди. Тақиллаётган овозни эшишиб, томга чиқди. Пастга эгилиб қаради ва ўғрини кўргач: «Эй йигит, кимсан, ярим кечада нима қиласан бу ерда?», деб сўради.

Ўғри: «Эй жаноб, мен бир ногорачиман», деб жавоб қилди.

Уй эгаси: «Хўп, у ерда нима қиласан?», деди.

Ўғри: «Ногора чаляпман».

Уй эгаси: «Ногоранинг овози келмаяпти-ку?», деди.

Ўғри кулимсираб: «Сен хавотирланма, ногоранинг овози эратага «Эй воҳ!» деб додлаганингда эшитилади», деди.

Ҳаётимиз ва бор бисотимиз ўткинчи эканини унутиб қўямиз. Аллақачон ажсал тешаси уйимиз деворини кавлаётир, биз эса ҳамон ширин уйқудамиз. Зилзилалар, турли оғатлар дунё саройига аллақачон дарз кетказа бошлаган. Лекин инсоният ҳамон гафлат оғушида! Наҳотки, Сур чалингунига қадар уйғонмаса?!

ҚУЛ БИЛАН ХОЖА

Хожа ҳаммомга боришни истади. Унинг Сунгур исмли қули бор эди. «Эй Сунгур! Уйғон, бошингни ёстиқдан қўттар. Жория Алтундан тоғара, лунги ва совунни ол, ҳаммомга борамиз», деди.

Сунгур дарҳол ўрнидан турди. Ҳожаси айтган барча нарсани ҳозирлагач, ҳаммомга қараб йўлга тушдилар. Йўл бўйидаги масжид ёнидан ўтишаётганида, аzon овози эшитилди. Сунгур ҳожасига: «Эй менинг сахий, қўли очиқ хожам! Сиз мана шу дўконда ўтириб туринг, мен масжидга кириб, намоз ўқиб чиқай!», деди.

Ҳожаси рухсат берди. Сунгур масжид томон кетди. Намоз ўқиб бўлинди. Жамоат бирин-кетин тарқади. Орқаларидан имом ҳам чиқди. Сунгур эса пешин бўлса ҳам масжиддан чиқмади. Ҳожа уни кутиб ўтираверди. Кейин масжид эшиги олдида келиб: «Эй Сунгур! Нега ташқарига чиқмаяпсан, кутаётганимни унудингми?», деб сўради.

Сунгур: «Ҳожам, мени бу ердан қўйиб юборишмаяпти-ку, қандай чиқайин?!», деб жавоб берди.

Ҳожа: «Сени ким қўйиб юбормаяпти?», деди.

Сунгур: «Ҳожам, ким сизни ташқаридан ичкарига киритмаётган бўлса, мени ҳам Ўша ташқарига чиқармаяпти. Сизга у ердан буёққа қадам ташлатмаган, менга ҳам бу ердан ўёққа қадам ташлатмаяпти», деб жавоб берди.

Балиқларни қуруқликка чиқармаган денгиз қуруқликдагиларни ҳам ўзига киритмайди. Қулфни очадиган фақатгина Аллоҳнинг Ўзидир! Таваккул қилиб, таслим бўлиб, доимо Ундан рози эканингни билдири. Ундан қўрқиб, Ундан ҳаё қилишини ўзида жамлаган инсон қандай ҳам баҳтиёрдир!

НАВБАТДАГИ КИМ?

Бир йигит Ҳазрати Мусонинг хузурига келиб: «Менга ҳайвонларнинг тилини ўргатинг. Уларнинг сухбатини тинглаб, ибрат олай!», деди.

Ҳазрати Мусо: «Ўзинг кўтара олмайдиган юк остига кирма. Сен учун шу ҳолинг яхши», дедилар.

«Ҳеч бўлмаса, эшигимда ётган ит билан хўроздининг тилини биладиган бўлай!», деб ёлворди.

Ҳазрати Мусо йигитнинг бўлмағур ниятидан қайтаришга қанча уринмасинлар, у оёқ тираб туриб олди.

Ниҳоят, ҳазрати Мусо унинг ҳаққига дуо ва насиҳат қилиб, жўнатиб юбордилар.

Кейинги куни хизматкори супага дастурхон ёзаётганида, бир парча нон ерга тушиб кетди. Хўроз чаққонлик билан нонни илиб олди. Унинг бу ишидан ит ғазабланди: «Хой хўроз, сен буғдой, арпа, маккажўхорини ҳам ейсан. Менинг эса шу бўсағадаги нондан бошқа насибам йўқ. Нега менинг ризқимга кўз олайтиряпсан?!», деди.

Хўроз: «Ҳақлисан, бироқ сен ҳеч ҳам қайғурма. Эртага хўжайнининг оти ўлади, маза қилиб қорнингни тўйғизасан», деди.

Бу гапни эшитган одам дарҳол отини бозорга чиқарив сотди. Кейинги кун эрталабдан ит билан хўрозди кузата бошлади.

Ит хўрозга таъна қилиб: «Хўрозвой, от ўлгандан сўнг, биз қорнимизни тўйдирмоқчи эдик, нима бўлди?», деди.

Хўроз: «От-ку, ўларди. Хўжайн уни сотиб юборди. Аммо сен хотиржам бўл, эртага эшак ўлади, катта зиёфат сеники бўлади», деди.

Буни эшитган уй эгаси отхонага югорди. Эшагини бозорга олиб бориб сотди. Уйига қайтаркан, «Ҳайвонларнинг тилини

тушунганим яхши бўлди-да, қанча заардан кутулдим», деб ўйларди.

Эртаси тонгда «Қизиқ, бугун нимани гаплашишар экан?», деб ит билан хўрзанинг ёнига борди.

Ит яна хўрзга жаҳл қиласади: «Хой хўрз, бу сафар ҳам айтганинг бўлмади. Сен ҳам ёлғончиликни бошладингми-а?», деди.

Хўрз: «Йўқ, мен ёлғон гапирганим йўқ. Эшак ўларди, аммо хўжайин уни ҳам сотиб юборди. Бироқ сен ҳеч хафа бўлма. Эртага унинг энг севимли хизматкори ўлади. Мархум ҳақига берилажак хайр-эҳсон, овқатлардан ҳаммамиз тўёмиз», деди.

Суҳбатни эшитган уй соҳиби вақтни бехуда ўтказмади, яна тезда чорасини кўрди ва: «Шу хўрз билан итнинг тилини билишим жуда яхши бўлди-да. Мана бира тўла учта заардан омон қолдим!», дея севинди. Эртасига ҳам ҳайвонларнинг гапига қулоқ берди. Ит бу сафар ниҳоятда қизишган эди: «Ёлғончи хўрз! Қани хизматкорнинг ўлганию бизнинг корнимиз тўйгани? Неча кундир мени ёлғонларинг билан овутасан. Шу сенга ҳеч ярашадими-а?!», деб хурди.

Хўрз: «Мен ёлғончи эмасман. Хизматкор ҳам ўлди, бироқ бошқа жойда... Хўжайин яхши иш қилмади. Келадиган бало биринчи отга урганида эди, бошқаларга тегмасди. Афсус... хўжайин ғафлатда қолди, энди навбат ўзига», деди хўрз.

Банда Аллоҳ берган неъматга оз ё кўплигидан қатъий назар рози бўлиши лозим. Чунки меҳрибон Парвардигор унинг нафси нимага лойиқ эканини яхши билади. Банданинг бу мувозанатни бузишга уринишининг оқибати қандай якун топганинг ёрқин мисолларидан бирини эса ушибу ҳикоядан англалик.

ТҮРТИНЧИ КИТОБ

ЭНГ ГҮЗАЛ ШАҲАР

Бир маҳбуба ошиғидан: «Эй маҳбубим, сиз кўп саёҳат қилган, кўп шаҳарлар кўрган инсонсиз. Айтингчи, улар ичидаги энг гўзали қайси шаҳар экан?», деб сўради.

Ошиқ ҳеч ўйланмасдан жавоб берди: «Энг гўзал шаҳар севганимиз бор шаҳардир. Подшоҳимиз тўшагини қаерга ёйса, у ер нина тешиги сингари тор бўлмасин, биз учун кенгдир. Қаерда ой каби чехраси порлоқ Юсуф бўлса, қудуқнинг туби бўлса ҳам, у ер мен учун бамисоли жаннатдир!».

ДОВУЛЧИ ТУЯ

Бир бола далада қоровуллик қилиб ўтиради. Чилдирмаси билан экинга қўнган қушларни ҳайдарди. Бир куни Султон Маҳмуднинг қўшини келиб, дала четига қароргоҳ қурди. Қўшиннинг бир туяси бўлиб, аскарлар унинг устига навбатчилик довулини жойлаштиришган эди. Ҳар навбат алмашган пайти довул⁵ чалинар эди.

Туя экинзорга кириб кетди. Бола чилдирмасини чалиб, уни ҳайдамоқчи бўлди. Туя унга парво ҳам қилмади. Бола бу туянинг чилдирмадан-да жарангли довул овозини тинглаб юрганини билмасди. У чилдирмани қанча чалмасин, туя ҳеч нарса бўлмагандек далада кезарди.

Ўзлари довул каби бўлган инсонлар, кичик таҳдиидлардан қўрқмайдилар. Мен «Лаа» яъни йўқлик қиличи билан қурбон бўлган бир ошиқман. Нафсимни тийиб, Ҳаққа боғланган руҳим – дард ва балолар довули чалинган ердир. Менга келган дард, изтироб ва кўзларимга қўрсатган ҳар хил балолар билан қўрқитишингиз, боланинг кичкина чилдиримадан чиқараётган овозига ўхшайди.

⁵ Чамбарак шаклида ясалган бўлиб, тўқмоқ ёки таёқ билан уриб чалинадиган чолгу асбоби.

ОТНИНГ ТОЙГА НАСИҲАТИ

Бир от тойчоғи билан анхор бўйида сув ичаётган эди. Отбоқарлар қолган йилқиларни ҳам қирғоққа чакириш учун хуштак чалишди. Той бу овоздан чўчиб сувдан бошини кўтариб, ён-атрофга аланглади.

От: «Нимага чўчидинг, нега сув ичмаяпсан?», деб сўради.

Той: «Анави одамлар хуштак чалганидан қўрқаяпман», деди.

От: «Болажоним, дунё яралганидан бери улар шундай эди ва шундайлигича қолади. Бўлмағур ишлар қиласиганлар ҳаётда кўп учрайди. Сен уларга аҳамият берма, сувингни ич. Улар тез орада соқолларини юлиб, қилган ишларига пушаймон бўладилар!», деди.

Вақт оз, умр қисқа. Сувдек оқиб кетаверади. Ақлингни йиғда, дунёдан айримасингдан ҳаёт сувига қон. Авлиёларнинг сўзлари оби-ҳаётга, дуру жавоҳирга бой мусаффо дарёга ўхшайди. Фурсатинг бор экан, ундан ичиб қол ва қалбинг богида бир-биридан гўзал маъно гуллари очилсин.

Эй аҳволидан бехабар, ташна ва ғофил! Биз авлиёларнинг ирмоқларидан ҳаёт сувларини ичмоқдамиз. Сен ҳам кел, бу сувдан тотгин-да, гўзал ҳаётингни топ. Дунё ишларига берилиб, маънан кўр бўлганингдан бу сувни кўрмаяпсан.

Модомики бу ирмоқда сув борлигини эшиштаяпсанг, ҳеч бўлмаса, кўрлар каби тогорангни ирмоққа ботир. Тогоранинг огирашаётганини ҳис қилганингда эса, унинг сувга тўлганини англайсан. Ҳақиқатни тушуниб етганингдан кейин, кўнглинг тақлидлардан қуттила бошлиайди.

Тойдан мақсад Ҳақ йўлига эндиғина тушган инсондир. От эса муршид, яъни тўғри йўлга бошловчи раҳнамони англатади.

Аллоҳнинг китоби ва Унинг дўстларининг сўзларига қулоқ бермай юз ўғирадиган инсонлар жоҳиллардир. Муршид ўз

муридиға «Кўнглингнинг тобора ёшариши, у ерда иймон ва муҳаббат гуллари очилиши учун Аллоҳнинг каломига, Унинг суюкли дўстларининг ҳаёт сувидек лозим ва лаззатли гапларига қулоқ тут», деб уқтирумокда.

СИРЛИ МАСЖИД

Рай шаҳри атрофида бир масжид бор эди. Унда тунаган одам сахаргача тирик қолмас, ахлига эсон-омон ета олмасди. Атрофдагилар: «Масжидда жинлар бор, кечаси ўтмас қилич билан ўлдиради», деб ваҳима қилишарди. Айримлар масжид дарвозасига: «Эй мусофир! Агар жонинг керак бўлса, асло бу ерда тунама! Чунки бу ерга ажал тузоғи қўйилган!», деб тахтага ёзиб, осиб қўйиш керак, кечга яқин «Масжид дарвозасини қулфлаш даркор», дейишарди.

Бир йигит масжид ҳақидаги даҳшатли гапларни эшилди. Йигит жуда мард ва қўрқмас эди, бу гапларнинг тўғри ёки нотўғрилигини синаб кўришга қарор қилди. Одамларга масжидда тунашини айтгач, улар: «Агар ақлинг бўлса бу ерда тунама! Бу ерларга бегона бўлганинг учун хавф-хатарни сезмаяпсан. Унда қолган кишининг умри паёнига етади. Бу уйдирма эмас, биз бунга кўп гувоҳ бўлдик!», дейишди.

Йигит гапидан қайтмади: «Нима бўлса ҳам, бу оқшомни мана шу масжидда ўтказаман!».

Мусофир масжидга кириб узаниб ётди. Лекин у ерда ётган одамнинг кўзларига уйқу келармиди. Коронги тушгач, яrim кечаси бир овоз эшитилди: «Эй манфаат истаган киши, сенга борайми?».

Даҳшатли овоз роппа-роса беш марта такрорланди. Йигитнинг қалбига қўрқинч тушиб, титрай бошлади. Кейин ўзига-ўзи: «Кўрқма, ўзингни тутиб ол, бу овоздан фақат иймонсиз кишилар қўрқкан», деб, жойидан сапчиб турди. «Мана мен тайёрман, агар мард бўлсанг кел!», деб бақирди.

Унинг мардонавор овозидан тилсим бузилди ва масжиднинг ҳар бурчагидан олтинлар тўкила бошлади. Олтин шунчалик кўп тўкилардики, йигит: «Масжидни тўлдириб юбориб, эшик очилмай қолади», деб ўйлади. Сўнг олтинларни

идишларга жойлаб олиб кетди.

Бу ҳикояни эшишган кўр киши ва олтинга қўнгил қўйған Ҳақдан гофил инсонларнинг кўз ўнгида аслида сариқ илон бўлган олтинлар гавдаланди. Ёш болалар ҳам кичик идешларга тангачаларни солиб, уни «олтин» деб юришади. У тангачаларга «олтин» деб ном беришгани учун, қаерда “олтин” деган сўзни эшишиша, хаёлларига ўша тангачалар келади.

Лекин мен ҳикояда айтиётган бойлик – Ҳақнинг зарбхонасида тайёрланган «маъно олтинлари»дир. Улар касотга учрамаганлариdek, ҳеч эскирмайди ва абадийдир. У шундай хазинаки, дунёдаги барча олтинлар ўз жисолоси ва гўзаллигини ана шу хазинададан олгандир. Қалбни бойитган ўша олтинлар порлоқликда ойдан ҳам устундир.

АТИР ҲИДИ

Бир одам хушбўй атиrlар сотиладиган бозордан ўтар экан, хушидан кетиб йиқилди. Муаттар ҳидлар кишининг бошини айлантириб қўйганидан бечора йўлда узаниб қолди. Одамлар атрофига тўплана бошлади. Улар бу бечорага ёрдам бермоқчи бўларди.

Бири қўлинни қўксига қўйиб юраги уриб-урмаётганини текшиrap, бошқаси эса юзига гул сувидан сепар, унинг айнан шу сувдан беҳуш бўлганини билмасди. Бирор ҳарорати тушсин деб, пешонасига ҳўл сомон қўяр, бошқаси эса малҳам тайёрламоқчи бўлар, яна кимдир тоза ҳаво олдиришга уринарди. Бири томир уришини текшиrap, яна бири «сарҳуш эмасми» дея оғзини ҳидларди. «Фалончи хушидан кетиб бозорнинг ўртасида ётибди», деган гап тезда ҳаммаёққа тарқади. У тери ошлайдиган уста эди. Ақлли, фаҳм-фаросатли укаси бор эди. Унга ҳам бу хабар етиб келгач, акаси томон югурди. Ўзи билан бирга итнинг ахлатидан ҳам олган эди. Атрофдагиларга қарата: «Мен акамнинг нега хушидан кетганини биламан. Сабабини аниқлагач шифо топиш осон бўлади», деди.

Кейин ўзига ўзи: «Мана ахлат ҳиди бунинг бутун вужудига сингиб кетган. Чунки у шу орқали тирикчилигини юргизган, мана шу сассиқ ҳид ичида эрталабдан кечгача териларни йифиб тайёрларди. Умрида биринчи марта атир бозоридан ўтиши, шу хушбўйлар буни хушидан кетқизган!», деди.

Укаси «дори»ини ҳеч ким кўрмасин деб, атрофдагиларни узоқлаштирди. Сўнг ахлатни акасига ҳидлатди. Бироз ўтгач одам хушига келди. Томоша қилиб турганлар эса ҳайратланиб: «Бу одам касалга бир афсун ўқиди, бирор нарсага афсун ўқиб ичирди», дейишарди.

Нопок турмушига ўрганиб қолган кимса покиза ҳаёт билан қаршилашганда, ҳақиқий ҳидоят йўлига чорланганида, уни қабул

қилишии беҳад мушкул. Ўзи ўрганган ҳаётга таассуб қиласди, қанчалик ноҳақ бўлишига, аҳволининг нақадар ачинарли эканига қарамай, нажсом кемасига чиқшиидан қайсарлик ила бош тортади.

ҚАНЧА ТУПРОҚ ЕСА...

Тупроқ ейишга одатланган бир одам шакар олиш учун дўйонга кирди. Дўйончи бироз ҳийлакор эди. Тарозининг ўлчов тошлари темирдан эмас, тупроқдан эди.

Харидор: «Шакар олмоқчи эдим», деди.

Дўйончи: «Яхши, лекин билиб қўй, тарозимнинг ўлчови тупроқдан ясалган», деди.

Харидор: «Шошиб турибман, шакар олишим керак. Тарозингнинг тоши тупроқданми, бошқаданми менга нима? Ўзим ҳам тупроқ ейишни жуда яхши кўраман?!», деди.

Дўйончи тарозининг бир палласига тупроқ қўйиб, ўзи шакар олгани кетди. Тупроқ ейдиган харидор чидолмай, тупроқдан оз-оздан ейишни бошлади. Дўйончи унинг бу ишини кўриб, ич-ичидан: «Е, кўпроқ егин! Қанча тупроқ есанг, оладиган шакаринг шунча камаяди. Сен ҳозир қанча шакар олганингни кўрганда, кимни алдаганингни биласан», дерди.

Дунё – заиф, иродасиз кимсалар учун тузоқ. Охират мулки эса – буюк инсонларнинг насибасидир. Охирида оладиган шакарингни кўрганда, ким жоҳил, ким оқил эканини биласан. Дунё молига алданганлар, шакар ўрнига тупроқ еганлардир.

КҮППАК ВА КҮР ТИЛАНЧИ

Кўппак кўр тиланчига ташланди. Уст-бошини йиртиб, пароканда қилди. Тиланчи: «Эй кўппак! Шу он сенинг ҳамжинсларинг тоғу тошларда ўлжа қувиб, зебралар овлаб юрса-ю, сен қишлоқчада бир бечора кўр тиланчига ҳужум қиласяпсан, уят сенга!», деди.

Эй Ҳақни танимаган сохта шайх, сен атрофингга бир нечта кўр кишини тўплаб, «Булар менинг муридоларим» дейсан. Ўрнингдан тур-да, Аллоҳнинг арслонлари, яъни авлиёлар каби ёввойи зебраларни овла. Кўппак каби кўзи ожиз, чорасизларни қувлашдан уялмайсанми?!

ШОИР ВА ИККИ ВАЗИР

Шоирлардан бири шеър ёзиб, уни мукофот илинжида султонга тақдим қилди. Султон қўли очик, саховатпеша эди. Шоирга минг олтин беришни буюрди. Султоннинг сахий ва хушдил вазири бор эди. У: «Султоним! Бу оздири, унга ўн мингта олтин беринг. Ҳурсанд бўлиб кетсин. У каби муҳтарам шоирга, сиз каби сахий султоннинг минг олтин бермоғи муносиб иш эмас», деди.

Султон вазирининг гапини қўллаб, шоирга ўн минг олtinga қўшиб, кийим-кечаклар ва ҳадялар тортиқ қилди. Шоирнинг қалби шукухга тўлиб тошди ва атрофдагилардан: «Ажабо, бу шоҳона совға-саломлар кимнинг шарофати билан экан?! Султон нега менга бундай саховат кўрсатди?», деб сўраб-суриштириди.

Унга: «Султоннинг Ҳасан деган исми жисмига мос вазири бор. Бу ҳадялар унинг тавсияси биландир», дейишиди.

Бунинг ташаккури сифатида шоир вазир учун ҳам узун қасида ёзди. Уни шеърида мадҳ қилди ва вазирга олиб борди.

Орадан йиллар ўтиб, шоир яна фақирлашди. Шеър ёзиб, султоннинг хузурига йўл олди. Шеърида султоннинг саховатини мадҳ этган эди. Одатда, султон шоирларга минг олтин берар эди. «Бу шоирга ҳам минг олтин берилсин», деб буюрди. Олдинги вазир вафот этган, ўрнига эса бошқа вазир тайинланган эди. Янги вазир баҳил ва бераҳм эди. У: «Султоним, давлатнинг бир дунё эҳтиёжлари бор. Биргина шеър учун минг олтин кўплик қиласи. Мен шоирни бу минг олтиннинг ўндан бирининг чораги бўлган йигирма беш олtinga қўндираман», деди.

Аъёнлар: «Сиз бу шоирга эски вазир замонида ўн минг олтин берган эдингиз», дейишиди.

Вазир: «Менга қўйиб беринг, уни қўндираман, ўзи рози бўлади», деди.

Султон: «Майли, сен айтгандек бўлақолсин, шунда ҳам уни

севинтиргин. Чунки шеърида бизни мадҳ қилган», деди.

Шундан кейин вазир шоирни куттиришни бошлади. Орадан бир қишини ўтказиб юборди. Ёз ҳам ўтиб, куз келди, шоир эҳсонни кута-кута қариб кетди. Вазирнинг қилмишидан эзилди. Тоқати тоқ бўлгач: «Олтин бермоқчи бўлмасанг, ҳеч йўқса, ростини айтиб қўй. Умид қилиб ўтирмасдан кетайин», деди.

Вазир унга йигирма беш олтин берди. Шоир ҳайратланиб, ўйга толди.

Атрофдагилар: «Саховатли вазир дунёдан ўтди. Унинг ўрнига келган вазир эса бечораҳол-фақирларнинг ҳам терисини шилаяпти. Сен бу пулни ол-да, бу ердан қочиб қол. Йўқса, шундан ҳам маҳрум бўласан. Сен билмайсан, биз бу эҳсонни сенга олиб бериш учун оз-мунча тер тўкмадик», дейишиди.

Шоир: «Эй дўстлар, айтингчи, бу марҳаматсизнинг исми нима?», деб сўради. Улар: «Ҳасан», дейишиди.

Шоир эски вазирнинг ҳам исми Ҳасанлигини эслади. «Бу ҳам Ҳасан, аммо унинг ёмонлигидан инсонлар азобланади», деб саройдан чиқиб кетди.

Икки вазирнинг ҳам исми бир. Лекин табиатлари ва сифатлари тамоман бир-бирига зид эди. Шайх Саъдий: «Ҳар бир кўзи, қулоги борлар одам ҳисобланавермайди. Қанчадан-қанча шайтонлар одамга ўхшаши кўринишда бўлур, ҳақиқий одам эса гўзал ахлоқли кишиидир. Юз гўзаллиги ва бошқа гўзалликлар фонийдир», деганлар.

ФИРЬАВН ВА ҲОМОН

Фиръавн баъзида Ҳазрати Мусонинг гапларини эшитганида, қалби юмшаб, гапларига мойил бўларди. Иймон кетириш истаги туғиларди. Чунки ҳазрати Мусонинг каломи бекиёс таъсирчан, агар тош эшитганида, ундан сут отилиб чиқкан бўларди. Фиръавн мана шу ҳолатни вазири Ҳомонга айтганида, у: «Шу кунгача ҳукмдор бўлдинг, энди ҳирқаси ямоқ одамга қул бўлмоқчимисан?», дер эди.

Шу билан ҳазрати Мусо юз кунда иншо этган саройни Ҳомон бир кунда вайрон қиласади.

Эй ғофил инсон! Сенинг ақлинг ҳам ҳою ҳавасга асир бўлган юқоридаги вазир кабидир. Сенинг вужудинг иймон йўлини тўсив туради. Ҳақнинг дўстлари сенга ўғит айтса, баданинг истакларига тобе ақлинг унинг гапларини таъсирсиз ҳолатга олиб келади. Ақл сенга: «Бу номақбул гапларга қулоқ тутма!», дейди.

Баъзида ақл бизни ҳақиқат йўлидан адаштиради, илоҳий муҳаббат ва иймонга қарши васвасаларни ичимизда уйғотади. Буни Фузулийнинг мана бу сатрларидан ҳам англаш мумкин:

«Мен ақлдан истайман далолат,

Ақл менга кўрсатади залолат».

МАЖНУН ВА УНИНГ ТУЯСИ

Мажнун Лайлининг қишлоғига бориш учун туяга ўтириб йўлга чиқди. Унинг ягона истаги тезроқ ёрининг висолига етиш. Туя эса ортда қолдириб келаётган болаларини ўйлар, мақсади тезроқ орқага қайтиш эди. Эгаси түнинг устида уйқуга кетса, жонивор буни сезар ва йўлини болалари томонга бурарди. Мажнун уйғонганида, анча орқага қайтиб қолишиганини кўрарди. Бу йўловчилик икки-уч кун шу йўсун такрорланаверди. Мажнун кўрдики, бу ҳол яна узоқ давом этади. Туядан тушиб: «Эй тuya! Иккимиз ҳам ошиқмиз. Лекин ишқимиз бир-бирига зид ва тескари. Демак биз бир-биrimizga йўлдошлиқ қилишга тўғри келмаймиз. Сенинг севгинг ҳам, эгаринг ҳам менга бўйсунмайди. Кел, бир-биrimizдан шу ерда айрилайлик», деб туяни қўйиб юборди.

Мажнун – инсон руҳининг мисоли. Руҳ азалий ва абадий Маъшуқига, яъни Роббига муҳтож ва муштоқдир.

Туя эса – нафс, моддий орзу-истакларнинг кўрининши. У болалари бўлган ҳою-ҳаваслар томон чопмоқда.

МУҲТАШАМ САЛЛА

Бир олим салласини йиртиқ латталар билан тўлдириб юрарди. Гўёки салласининг ҳашаматли кўриниши мажлисларда уни хурмат-эҳтиром қилишларига сабаб бўларди. Эски кийимларидан парчалар кесиб салласини безар, каердан бир парча мато топса, салласининг ичиға тиқиб қўярди. Ичи турли латта ва безакларга тўла салласи ростдан ҳам чиройли кўринар, олимга ярашиб турагар эди. Лекин ичи тўла қийқим эди. Бир куни сахарлаб мадрасага кетаётганди. Ўша пайт бир ўғри ўлжа пойлаб, йўл юзида турагар эди. Олимнинг бошидаги савлат тўкиб турган саллани кўриб чидолмади. Сотиб пул топиш илинжида унинг бошидаги саллани ўғирлаб қоча бошлади. Олим ўғрининг орқасидан: «Эй йигит! Салланинг ичини очиб қара. Ундан кейин ўғирласанг ўғирлайвер, мен розиман!», деб бақирди.

Ўғри қоча бориб, саллани ечди. Юзлаб латта-путта сочилиб кетди. Қўлида фақат эски бир мато қолди. Ўғри уни улоқтириб: «Эй ҳийлакор! Сен бу ҳийланг билан мени ишдан қўйдинг!», деб бақирди.

Олим хитоб қилди: «Сени огоҳлантирдим. Саллани ечиб, кейин олиб кет, дедим».

Дунё ҳам шу каби жозибаси ва гўзаллигини намоён қилган. Лекин у ҳам бақириб ўзининг бевафолигини кўрсатган. Кавн – пайдо бўлмоқ, фасод – бузилмоқ демакдир. Дунёда вақти-вақти билан мавжуд бўлиб, кейин яна йўқ бўлганимиздан дунёга “кавну фасод” олами дейилгандир.

Бухоролик шоур Рудакийнинг шу маънода бир қитъаси бор: «Замон менга ҳурриятни ато этадиган бир насиҳат қилди. Зотан дунёга бир боқсанг, унинг насиҳатдан иборат эканини кўрасан, у айтдики: “Масъуд кўринган кишиларнинг ҳолига ҳасад қилмасдан, ўзингнинг ҳолингга шукр қил. Кўп инсонлар сенинг ўрнингда бўлишини истайдилар».

Урфалик Набил Марҳум ҳам: «Аҳволи сендан ёмон бўлган инсонларнинг ҳолига боқиб, Аллоҳга шукр қилмоқ сендан яшироқ ҳаёт кечираётган кишиларнинг ҳолларига ҳасад қилиши касаллигингни даволайди», деганлар.

Кундузи нур сочган порлоқ қуёшининг юзини кўрганингда, кеч тушиши пайтида унинг чарчаб, хасталаниб қонларга ботган ўлимини ҳам ёдингда тут.

Кечаси осмонда тўлин ойни кўрдинг ва мунавар ёғдусига ошиқ ҳам бўлдинг. Ой охир-оқибат заифлашиб, ингичкалашиб жон берәётганидаги ҳасратини ўйла. Инсоннинг ҳам кучга тўлган, қариган ҳоли ва сўнгра чўкишии бордир.

ҚУШНИНГ УЧ ЎГИТИ

Бир бечора қуш тузоққа тушиб, қафасга маҳкум бўлди. Тутган кишига: «Эй инсон! Сен ҳаётингда қўй ва сигир еган, тuya ҳам сўйгансан. Уларнинг гўштига тўймаган экансан, меникига асло тўймайсан! Мени қўйиб юбор, эвазига сенга уч ўтит айтай. Бу ўгитларнинг биринчисини қўлингда туриб, иккинчисини анави том устига чиқиб, учинчисини эса дараҳт шохидаги айтаман. Сен бу уч ўгитга қулоқ солсанг, албатта, баҳтиёр бўласан!», деди.

Овчи қушга ишонди. Ёлворишлидан сўнг таклифига рози бўлди. Қуш: «Сенга биринчи айтадиган ўгитим шудир – бўлиши мумкин бўлмаган нарсаларни ким гапирса гапирсин, асло ишонма!», деди.

Овчи уни қўйиб юборди. Қуш учиб уйнинг томига қўниб, иккинчи ўгитини айтди: «Қўлингдан бой берган ўткинчи нарсалар учун асло тушкунликка тушма. Бой берилган нарсанинг ортидан ғам чекма», деди.

Сўнг дараҳт шохига қўнди ва учинчисини айтмасдан олдин: «Ичимда ўн дирҳам оғирлигида бебаҳо марварид бор эди. У сени ҳам бола-чақангни ҳам бой қиласарди. Лекин сенинг тақдирингда йўқ экан, қўлингдан кетди», деди.

Овчи қушнинг гапларини эшитар-эшитмас, бақириб, афсус-надомат чекди. Қуш: «Мен сенга қўлингдан кетган нарса учун асло тушкунликка тушма, демадимми? Модомики, марварид қўлингдан кетибди, энди нега ўзингни азоблаяпсан? Ҳозиргина айтганларимни унутдингми? Сенга «Бўлиши мумкин бўлмаган нарсаларни ким гапирса ҳам ишонма!» дегандим. Эҳ нодон, ўзимнинг оғирлигим уч дирҳамлик тангачадег-у, ичимда ўн дирҳамдек келадиган марварид нима қиласади?!», деди.

Овчи бироз ўзига келиб: «Майли, энди учинчи ўгитингни айт», деди.

Қуш: «Сен шу айтилган икки насиҳатга қулоқ солдингми, сенга учинчисини айтай? Ухлаб ётган одамга панд-насиҳат қилиш унумсиз ерга уруғ экиш билан баробардир!», деб, учиб кетди.

ОЙ БИЛАН ДЎСТЛАШСАНГ...

Мисрлик бир қибтий ташналиқдан ўлар ҳолатга келганида Бани Исроиллик кишининг эшигини тақиллатиб: «Мен сенинг дўстинг ва яқинингман. Бугун сенга ишим тушди. Мусо Нил дарёсини сехр-жоду билан афсунлаб қўйди. Қачон бир қибтий ундан сув олмоқчи бўлса, сув қонга айланаяпти. Аммо сиз учун дарё суви тоза ҳолида турибди. Қибтий қавмининг сувсизликдан тинкаси курияпти, бу уларнинг ёмонлиги ёки бадбахтлигидан. Сендан илтимос, ўзинг учун сув олиб менга бер, ичиб ўзимга келайин. Ўйлайманки, сувни сендан олгунимча қонга айланиб қолмас», деди.

Бани Исроилдан бўлган киши дарёдан сув олди. Сув тоза ватиник эди, ундан тўйиб ичди ва қибтийга узатди. Қибтий идишни олиб, энди ичаман деганида, сув дархол қонга айланиб қолди. Қибтийга идишни қайтарганида эса сув яна ўз ҳолига келди. Бу ҳол бир неча маротаба такрорланди. Қибтийнинг жаҳли чиқди: «Бу ишнинг сири нимада, нега биз сувдан ичолмаяпмиз?!», деб сўради.

У: «Бу сувдан фақат Аллоҳга иймон келтирганларгина ича оладилар. Иймонли кишилар Фиръавннинг йўлидан қайтиб, Мусога эргашган кимсалардир. Сен ҳам Мусога иймон келтириб унинг умматидан бўл. Ой билан дўстлашсанг, ой ёғдусини кўрасан», деб жавоб қилди.

Аллоҳ бандаларига кифоядир. Банда борлиқдаги барча яхшиликларни тиласа ва дуо қилиб сўраса, унинг истагини қондира олади.

Мўмин-мусулмон бўлиши билан инсон ўз жони ва молини Аллоҳга сотади. Аллоҳ таоло эса Унинг йўлида молию жонини фидо қилган мўмин-мусулмон бандасига бунинг эвазига жсаннатни беради. Шунинг учун ҳеч бир муслим савдони бузмаслиги, Аллоҳга сотган жони ва молини беришга доим

тайёр турмози лозим.

БАХИЛ БАДАВИЙ

Бир бадавийнинг ити ўлар ҳолатда эди. Эгаси хафа бўлиб, кўзидан ёмғирдек ёш оқизиб нола қиласди. Шу орада бир тиланчи ўтиб қолди. У бадавийдан: «Нега йиғлаяпсан, ким учун бунчалик қайғураяпсан?», деб сўради.

Бадавий: «Кучугимдан айриляпман, у ўлаяпти. Кундузлари мен учун овчи, кечалари қоровул эди. Ундан на бир ўлжа ва на ўгри қочиб қутиласди. Ана шундай қийматли жонивор эди!», деб жавоб берди.

Тиланчи: «Дарди нима экан?», деб сўради.

Бадавий: «Уни очлик шу ахволга туширди, итим очлигидан ўлаяпти», деб жавоб берди.

Тиланчи: «Халтачангда нима бор?», деб сўради.

Бадавий: «Кечадан қолган нон ва егулигим бор», деди.

Тиланчи: «Ундай бўлса, итинга нега бир бурда нон бермадинг?», деди.

Бадавий жавоб қилди: «Нон текинга келмайди, кўз ёш эса текиндир».

Тиланчи ҳайратланиб: «Эй марҳаматсиз инсон! Бошингдан тупроқ сочилгур, сенингча кўз ёши нондан ҳам қадрсизми?! », деди.

Қийин вақтларда инсон инсонлигини намоён этсин, вафосини кўрсатсин. Бекордан-бекор нолаю фигон ҳеч нарсани ҳал қилиб қўймайди.

ТУТҚИН ЖАЙРОН

Овчи ўрмонда жайрон овлади. Уни молхонага олиб бориб қамади. Жайрон хавотирланиб атрофига қарап, хуркиб қочишга уринарди. Овчи ярим кечаси келиб молларига сомон ташлади. Эшак ва ҳўқизлар сомонни еб қўйишиди. Жайрон эса гоҳ у томон, гоҳ бу томонга отилиб, сомоннинг чангидан юзини олиб қочарди. Қорни мушк билан тўла жайрон бир неча қун ана шундай азобда қолди. Бу ғурбатхонадан ташқарига талпинарди.

Ҳайвонлардан бири: «Жайронда султонлар феъли бор-да! Уни безовта қилманг, жим бўлинг!», деди. Иккинчиси жайроннинг ҳолига кулиб: «Гўё дур топиб олган-у, уни сотишига уринаётгандек?!», деди.

Яна бири: «Унга айтиб қўйинг. Бу нозиклик билан бу ерда турмасин, бориб султоннинг тахтига ўтирун», деб киноя қилди.

Бўкиб сомон еб қорнини қаппайтириб олган эшак жайронни ҳам сомон ейишга чақирди. Жайрон эса юзини буриб: «Эй эшак! Мени тинч қўй, иштаҳам йўқ, устига-устак, ҳолсизман!», деди.

Эшак: «Ҳа, ахволингни кўриб турибман. Сен ё нозланаяпсан, ёки уяляяпсан», деди.

Жайрон: «Сомон – сен еб семирадиган озуқанг. Сен шу билан танингни кўтариб юрасан. Мен эса анҳор бўйларида, боғларда кезиб юраман. Мен бу ерга сунбулу лола, райхон ва минглаб нозу неъматлардан маҳрум бўлиб келдим», деб жавоб берди.

Эшак: «Ҳа, сен айтган сафсата гапларни олдин ҳам кўп эшитганмиз», деди.

Жайрон: «Менинг қорнимдаги мушк-анбар сўзларимга исботдир. Аммо бошқа эшакларнинг ахлатини ҳидлашга ўрганган эшак қандай қилиб анбар ҳидини туйсин?!», деди.

Тошлилар орасида бўлса ҳам, марвариднинг қадр-

қийматидан ҳеч нарса камайиб қолмайди. Мушк-анбар ҳиди билан ахлат ҳидини ажратма олган покдомон, тақвадор мўминлар қанчалар баҳтли инсонлардир.

МАЖНУН НИМАДАН ҚҮРҚДИ?

Мажнун айрилиқ азобидан оғриниб, маҳзунлик оташида ёнарди. Охир-оқибат нафас ололмайдиган ҳолга келди. Мужнунни муолажа қилсин деб, табиб чақирилди. Табиб: «Қон олишдан бошқа чора йўқ», деди.

Қон оловчини топиб келишди. У Мажнуннинг томирларини чиқариш учун қўлини яхшилаб боғлади. Қон оловчининг наштарини кўрган Мажнун: «Ҳақингни олиб кетақол, менга тегма, ўлсам ҳам майли!», дея фарёд қилди.

Қон оловвчи: «Кечалари арслон, бўри ва бошқа йиртқич ҳайвонлар атрофингга тўпланишганида қўрқмайсан-у, шу матоҳдан қўрқаяпсанми?», деб сўради.

Мажнун: «Мен жоним оғришидан қўрқаётганим йўқ. Сабрим тоғу тошлардан ҳам қувватли. Мен шу кунгача ҳеч нарсадан қўрқнаним йўқ, зотан танам яралангандир. Мен бу яраларга ошиқман. Қалбимда Лайлонинг муҳаббати лиммо-лим, ундан бошқа нарсага жой қолган эмас. Сен наштар саншиб томиримни кесганингда, Лайлини хафа қилиб қўясан деб қўрқаман!», деди.

Аллоҳ ошиқларининг (авлиёларнинг) вужудлари ҳақиқий муҳаббат билан тўладир.

Бир куни Зулайҳодан қон олишиди. Қони ерга томчилаганидаёқ «Юсуф, Юсуф» деб фарёд чекди. Мажнун ҳам «Эй ҳижомачи! Сенинг наштаринг тизи менинг Лайлимга тегиб, уни яралаб қўяди деб қўрқаман. Чунки иккимиз бир бўлдик, биз бир танда яшаймиз», деди.